



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

### Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.


### About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

WIDENER




HN JQV2 W



8-131

Ital

6846.1



BOUGHT WITH

THE GIFT OF

WILLIAM GRAY,

OF BOSTON, MASS.

(Class of 1829).

10 Feb., 1864.





**COLLEZIONE**  
**DELLE MIGLIORI OPERE SCRITTE**  
**IN DIALETTO VENEZIANO**

---

**VOLUME V.**



# DITIRAMBI

D I

DIVERSI AUTORI

---

VOLUME QUINTO

---

✓  
V E N E Z I A

AL NEGOZIO DI LIBRI ALL'APOLLO

M. DCCC. XVII.

*Dalla Tipografia di Alvisopoli*



Ital 6846.1

# **EL VIN FRIULARO**

**DE BAGNOLI**

***D · I · T · I · R · A · M · B · O***

**DI ANDREA PASTÒ**



# EL VIN FRIULARO

## DITIRAMBO

**F**ra tante bele cosse  
Che natura al mortal despensa e dona,  
La prima, la maggior, la più ecelente,  
Che non la cede a gnente,  
E che superba va per ogni logo,  
Perchè tuti la vol, tuti la brama,  
Onorada da tuti  
Qual celeste regalo soprafin,  
Che'l cuor uman consola,  
Son certo, nè m' ingano, lu xe'l Vin:  
**Sì**, xe'l Vin quel dolce netare,  
Che consola, che diletta,  
Quela zogia predileta,  
Che brillante fa ogni cuor.  
**Lu** xe'l fonte d' ogni giubilo,  
De la pase e l' armonia;  
Ogni mal lu para via,  
Lu bandisse ogni timor.  
**Ma** fra i Vini el più stimabile,  
El più bon, el più perfeto

• Xe sto caro Vin amabile ;  
Sto Friularo benedeto (\*).

Lu ga i gusti più stupendi ,  
Tuti i odor più sontuosi ;  
No ga Vini el Benintendi (\*\*)  
Del Friularo più preziosi.

Viva sempre la memoria  
Del famoso Giulio Cesare ,  
Che à portà sto Vin in Udene  
Da paesi lontanissimi :  
Vin che dopò molti secoli  
Trasportà da man benefica  
In sto nostro clima docile ,  
In sta tera cussi fertile ,  
Xe riussio, secondo mi ,  
El più bon dei nostri di .

Su via donca alegramente ,  
Tuti toga el goto in man ,  
E bevemo fin doman  
De sto Vin cussi ecelente :  
Su via tuti alegramente .

Vegna in qua bozze e bozzoni ,  
Ingistare e botiglioni ,  
Canevete e bariloti ,

(\*) *Vino nero e squisitissimo, che si raccoglie in Bagnoli, Villa del Territorio Padovano, dove la nobile Famiglia Vidmann ha porzione delle sue rendite.*

(\*\*) *Mercatante di Vini Forestieri in Venezia.*

Zuche , fiaschi , squele e goti ;  
 Vegna pur sechi e mastei .  
 Vegna bote e caratei ,  
 Damigiane e madalene  
 De Friularo tute piene ,  
 E bevemo ,  
 E trinchemo ,  
 Tracanemo  
 Sto bel sangue vegetabile ;  
 Sto prezioso oro potabile .

**Benedeto !**

Che diletto ,  
 Che piacer ! mo che gran gusto  
 Che mi provo co te gusto !  
 Co te gusto , caro ben ,  
 D'alegrezza mi son pien ;  
 Co te bevo mi me sento  
 Tuto giubilo e contento .

**Guai se fusse una dona ... pofardia !**

Digo la verità , no conto frotole ,  
 Per bever de sto Vin mi ghe daria  
 La scufa , el busto , el capotin , le cotole .

**Bastonà ,**

Sculazzà ,  
 Morsegà

Da una vechia senza un dente ,  
 Più rabiosa d'un serpente  
 Sia colù che no 'l ghe piase ,

E la pase e'l dolce giubilo

Vaga lonzi dal so cuor ;

Ma indorà

Carezzà ,

Cocolà

Da una cara gnognoleta

De sto amigo amiga streta

Sia colù , che sempre coto

Da la sera a la matina

Xe più duro del biscoto ,

Xe più negro d' una tina ,

Sia colù , che ghe ne ingiote

In t' un ano diese bote .

Diese bote ! xe anca poco ,

O parlà cussì da aloco ;

Mi le bevo in manco assae .

Se vedessi che trincae !

E po , gnente , steme atenti ,

Se volè restar contenti .

Za 'l Friularo xe 'l più bon ,

E lu solo porta el vanto ;

Ma , benchè el me piase tanto ,

In mancanza de sto Vin .

No refudo el bon Corbin ,

El Gropelo ...

Ma bel belo ,

Co no'l xe più che dolzon ,

La roba dolçe me fa mal de stomego ,

La me sgionfa el bonfigole ;  
 La me desmissia i flati ;  
 Me par de aver in panza cento gati.  
 Son pezo de le femene,  
 De le ragazze isteriche,  
 Son debole de stomego ;  
 De fibra cussl languida ,  
 Che un pero , un pomo , un persego ,  
 Un figo , meza nespola  
 Me fa vengir el spasemo ;  
 El biro , le vertiginì ,  
 Col resto dei so diambernì ,  
 Nè trovo altro rimedio  
 A tuti sti desordeni ,  
 Che un fiasco de sto Vin benedetissimo ;  
 Che me remetè in stato perfetissimo .  
 Imparè , Done mie care ,  
 A conosser sto liquor ,  
 E no siè più tanto avaro  
 A lodarlo e farghe onor .  
 Savè pur a quanti incomodi  
 Zorno e note andè sogete :  
 Convulsion stramaledete ,  
 Cento specie de dolori ,  
 Svanimenti , bati cuori ,  
 Stomegane , e ... che soi mi ?  
 De sti malì in sto bocal  
 Gh' è 'l remedio general .



Gh' è 'l remedio general;  
 Gh' è 'l cordial el più potente;  
 Gh' è la droga più valente,  
 La più rara decozion,  
 La più scielta confezion,  
 L' elisir el più divin...  
 A le curte. gh' è sto Vin.

Mo, no xelo un gusto mato  
 A svodar sti bozzoncini?  
 Via de qua sti gotesini;  
 Sti cosseti da Moscato:  
 Questa è roba da amalai;  
 Mi per mi no i toco mai,  
 Bevo sempre col bocal,  
 E mai mal, e mai dolori...  
 Sì, Signori, domandèlo,  
 Sempre belo come un fior  
 Me mantegno,  
 Me sostegno  
 Tuto spirito e vigor.

Cossa feu che no bevè?  
 Si a la fè che vago in colera!  
 Via, sentilo co prezioso,  
 Co odoroso!  
 No gh'è gnente che ghe possa;  
 Anca el Cipro xe gustoso,  
 Ma el me fa la lengua grossa.  
 Bevè pur la Malvasia,

Mi la go per porcaria .  
 El xe assae megio del perfeto Scopulo ,  
 Del Alicante , del Moscato fin ,  
 Del Santo , del Braganze , d' ogni Vin .  
 Lo digo francamente *coram populo* :  
 Lu xe 'l Re de tuti i Vini ,  
 Dei Liquori soprafini .

Via de qua Montepulciano ;  
 Che se 'l beva tuto Baco ,  
 El xe giusto el so macaco  
 Del Friularo che ga un ano' .  
 Che Canarie ! che Tocai !  
 No i val gnanca i so pecai .  
 I me fa vegnir la rognà  
 Co i me nomina el Borgogna ,  
 El Reno , el Palma , el Visnà ,  
 El Sanremo , el Ratafia ,  
 El Clareto , el Sanloran ,  
 El Maderà , el Frontignan ,  
 El ... diavolo , che i strangola !  
 Butèli in te la zangola .

Andaria po' zo dei bazari  
 Co i vien via co 'l so Vermute :  
 No gh' è Roba più antipatica ,  
 Più contraria a la salute .

Questo , questo xe quel balsamo ;  
 Che fortifica ogni stomego ,  
 Che fa far la dieta ai Medici .

E falir le Spiciarie  
 Co le so potachiarie...  
 Ma tasè, che gh'è un remedio;  
 Ghe no posso disprezzarvelo;  
 Questo xe 'l Cremor de tartaro.  
 Mi per altro mai nol dopero;  
 Ma sapiè, che sior Domenego,  
 El me caro cuginadin,  
 M' à zurà *perdio bachissimo*,  
 Ghe'l xe un sal cavà dal Vin.

Oe, disè, quel Vin negron  
 Xelo fursi del Stradon (\*)?  
 Sì, per dia! l'è lu, l'è lu;  
 Sielo tanto ben vegnù!  
 Xe cent' ani che l' aspelo...  
 Benedeto,  
 Benedeto,  
 Benedeto  
 Ti, e la mama che t' à fato!  
 Mi son mato per sto Vin:  
 Coresin, vien qua, vien qua...  
 Sì, caro, sì,  
 Sì, fra ti e mi  
 Feghimo un prindese  
 Stracordialissimo

(\*) *Pezzo di Terreno dalla sua figura così nominato,  
 che produce il Friulano dell'ultima perfezione.*

A l'umanissima,  
 Veneratissima  
 PARONA amabile.

Illustre DONA (\*), onor del vostro Sesso,  
 D'ogni grazia e virtù gentil modello,  
 Ve sia propizio el Ciel, quel Ciel istesso  
 Che v'ha donà quel cuor che è tanto bel,  
 Quel Ciel che a Vu soleta v'ha concesso  
 El più caro, adorabile PUTELO,  
 Quel Ciel... ma, oh dio! bisognaria dir tanto  
 Che mai se feniria: bevemo intanto.

Su via bevemolo,  
 E a son de piferi,  
 Trombete e flauti;  
 Tamburi e timpani;  
 Chitare e cimbani,  
 Lironi e gnacare,  
 Su via onoremolo,  
 Imortalemolo,  
 E pieni de alerezza e de morbin  
 Cighemo tuti: viva sto bon Vin.

Viva, viva i me PARONI,  
 Cavalieri splendidissimi,  
 E i PARENTI nobilissimi  
 De sta CASA Ecelentissima;  
 Ma i xe tanti, e tanto i merita,

(\*) *La Nob. Donna Elisabetta Duodo Cont. Vidmann.*

Che fra Lori e i so' gran meriti,  
 Se volesse nominarveli,  
 Resteria senza polmoni:  
 Viva tuti i me PARON.

Viva, viva i Veneziani,  
 I me cari Patrioti  
 Grandi e picoli,  
 Vechi e zoveni,  
 Done e Omeni,  
 Zentilomeni,  
 Galantomeni (\*),  
 Poveromeni,  
 Castelani e Nicoloti (\*\*);  
 Viva tuti i Veneziani,  
 I me cari Patrioti.

Via de qua malinconia,  
 Bruta striga, va pur via:  
 Se me casca adosso el mondo  
 Mi, fradei, no me confondo;  
 E co un goto de sto Vin,  
 Sfido el diambarne e'l destin.  
 Co sto Vin xe puro e mero,  
 Col xe fato a tempo giusto,  
 El riesse tanto fiero,

(\*) Voce che in Venezia nota il ceto medio.

(\*\*) Il Pòpolo di Venezia suole dividersi in due corpi,  
 quello de' Castellani, abitanti nel sestiere di Castello, e  
 quello de' Nicolotti abitanti in quello di S. Niccolò.

Cussì negro è pien de gusto ;  
 Che 'co 'l bevo vago in estasi ,  
 E me sento tuto, tuto  
 Bisegar, ma dapertuto ,  
 Da quel so potente spirito ,  
 Che a le volte infin m' ispirito .

A Bagnoli , a Bagnoli , carissimi ,  
 Da sto Vin che fa tanti miraceli ,  
 A Bagnoli , Poeti fredissimi ,  
 Se volè deventar tanti oracoli .  
 Qua gh'è 'l Monte , gh'è 'l Fonte , gh'è Apolo ,  
 Gh'è 'l Liquor , gh'è le Muse , gh'è l' Estro :  
 Sto bon Vin , sto bon Vin lu xe 'l solo ,  
 Che ai brayazzi `pol far da maestro .  
 A Bagnoli , a Bagnoli v' aspeto  
 Da sta fiamma che infama ogni peto .

Vegna , vegna anca i più fervidi ,  
 Vegna i Cigni canorissimi ,  
 I Poetoni , i primi Doti ,  
 Anca vu , sior CESAROTTI ;  
 Che a sta Fonte  
 No sdegni de acostarse el PENDEMONTI .  
 Me dirè mo a cossa far ,  
 Se savè cussì cantar ?  
 A tastar sto ben liquor ,  
 A impenirve del so ardor ,  
 A compor una Bacheide  
 Più sublime de l' Eneide .

a

Che se ancuo i ve crede **OMINO**  
 Vivo e vero,  
 Co in sto Pindo vu sarè;  
 E che indosso gavarè  
 No chitare, no lironi,  
 Ma do grossi e bei fiasconi;  
 Uno in panza e l'altro al colo;  
 Sarè alora el vero **APOLO**.

Pare Bepo (\*), pare, sana,  
 Via, mainè quella Tartana;  
 Vollè bordo, e vegni a tera;  
 Ma vegni col vostro **BACO**,  
 Che za credo stufo e straco  
 De far guera in mezo al mar:  
 Via, vegnilo a restorar.  
 Varenta vu che al son de sto bocal  
 Ghe torna tuti i spiriti a capitolò,  
 E dopo aver bevuo tre quatro sessole  
 De sto Vinon che 'l centopezzi imbalsema;  
 El ghe reniova un prendese badial  
 Al vostro Abate **COSTA** inanzolao,  
 Che anca da mi de cuor xe saludao...

Cossa xe? corte bandia!  
 No voi gnente, portè via...  
 Pan de Spagna? diomelibera!

(\*) Il Dottore Giuseppe Menegazzi amico dell'Autore,  
 alludendo al suo *Dittirambò il Bacco in Mare*.

No dassenò , Paroncina ,  
 No magno gnanea late de galina:  
 Piuttosto , se la vol , tratandose de ela ,  
 Mi buto via sto goto , e bevo co la squela :

La gran rabia che mi provo  
 Co m' incontro in quei magnoni ,  
 Che destermina i caponi ,  
 Le dindiete e i colombini ,  
 E che sorbe come un vovo  
 I bodini ,  
 I tortioni e le rosae ,  
 E po dopo ste magnae ,  
 Au mai visto i oseleti ?  
 Sti lovoni  
 Sfondradoni  
 Beve el Vin cussi a sorseti .  
 Vedeu mi ? con un crostin  
 Sugo un sechio de sto Vin ,  
 De sta cara perla d' oro ,  
 De sto brodo da restoro .

Ghe darave de le scopole  
 A quei cani  
 De vilani  
 Che ghe missia drento P aqua .  
 Maledeto el Vin agnatico ,  
 E i sassini che lo in aqua !  
 Mi lo vogio sempre puro ,  
 Sempre grosso , sempre duro ,



Che 'l se taglia col cortelo!  
 Co 'l xe cussì mi svodo el caratelo.  
 L' aqua, come savè, marciasse i pali,  
 La porta mile dani a la salute;  
 La fa che chi la beve vegna zali;  
 Che meta suso panza anca le pute:  
 Va pur via,  
 Zogia mia,  
 Va dal caro PIZANELI;  
 Va pur da mio compare BONICELLI:  
 Se languisse,  
 Se sbasisse da la sè,  
 No ghe meto suso el naso:  
 La go in odio, no gh'è caso...  
 Cossa? l' aque medicate!  
 Siori sì, giusto a proposito  
 Per lavarse le culate.  
 Bevè pur l' aqua de Cila,  
 De Nocèra, de la Vila,  
 De la Brandola, del Sasso  
 Se volè andar tuti a spasso,  
 Bevè quella a Recoaro,  
 Quela... quela... quela, un corno:  
 Me fe andar la testa a torno.  
 Bevè questo, questo, questo,  
 Sto Friularo,  
 Marmotoni!  
 Ve daria dei pizzegoni.

**Su, da bravi, alegramente:**

Tuti toga el goto in man;

E bevemo fin doman

De sto Vin cussì ecelente:

Su via tuti alegramente.

**Vaga pur l'amor al diavolo;**

Che son stufo de quel piavolo:

Oh donete mie carete;

Madamine sveltoline,

Zogie bele, furbarele,

Studiè pur quanto volè;

Che mai più no me cuchè:

Ridè,

Cantè;

Balè,

Pianzè,

Sustè,

Smaniè;

Mai più, mai più, mai più no me cuchè.

Andè pur dai vostri amanti

Spasemanti, deliranti,

Da quei cari polastroni

Semplizzoni, balordoni;

Che per mi go bu'l bisogno.

Co ghe penso me vergogno.

**M' emè vu, Madam? - Uì,**

*Uì, mon ser, ze mur pur vu.*

**Domandème un poco a mi**

Sior cucheto de *Monsù*.

Viva, viva la mia Nina

Frescolina,

Tondolina.

Viva, viva quel bochin

Stretolin,

Quel lavreto cremesin.

Restaressi,

Stuppiressi

Se vedessi

Quanto ben me vol custia.

Ma chi xe sta cara fia?

Che curiose! le gran femene!

Una bela damigiana,

Che con mi fa sempre nana.

Che ricchezze!

Che grandezze!

Mo, che onori!

Via cavève, cari stori;

Queste xe minchionarie?

No ghe dago un gotesin

De sto Vin

Per disdoto monarchie.

*Quanto è bella la Virtù!*

Sì, n' è vero? cari vu!

No gh' è i pezo dei virtuosii

I ga tuti i mali cronici,

I xe tuti malinconici.

Panzarini;  
 Del color dei canarini;  
 E per causa de sti incomodi  
 I riesse fastidiosi,  
 Despetosi,  
 Tarocconi,  
 Litigoni,  
 Tuti, tuti malsestoni.  
 Vedeu mi, che mai no studio  
 Che su'l libro del bocal,  
 Se son rosso come un gambaro,  
 Se con tuti son genial?

Via da bravi tremo su:  
 Gran piaser che dà costù!  
 Che comedie?  
 Che tragedie?  
 Che spettacoli?  
 Che festini?  
 Che casini?  
 Che delizie?  
 Che Brenta (\*)? che Stra (\*\*)?  
 Che Padoa? che Pra (\*\*\*)? . .

(\*) *S' intende il solo braccio del fiume Brenta che offre un amenissimo tragitto da Padova alle Venete Lagune.*

(\*\*) *Paese lungo gli argini della Brenta, corredato dalla deliziosissima Villa Reale.*

(\*\*\*) *El Pra de la Vale. Vastissima piazza di Padova, luogo una volta fangoso ed impraticabile, disegnato poi, e ridotto magnifico e ameno.*

Alto qua .  
 So anca mi che 'l xe magnifico ,  
 E che Padoa ga rason  
 De tegnir se tanto in bon .  
 Viva pure el gran talento ,  
 El bel GENIO ,  
 Che à dà moto a quel portento (\*) ;  
 Ma a parlarve schieto e neto ,  
 Anca el Pra ga el so difeto .  
 Sì , Signori ,  
 Sì , Signori ,  
 Ghe voleva dei fiasconi ,  
 Dei pistonì ,  
 Dei piloni  
 Tuti pieni de sto Vin ;  
 Ben disposti fra le statue  
 Come i vasi d' un zardin .  
 Diesè bote per canton  
 Messe in forma de piramide ,  
 Che formasse quatro guglie  
 Superbissime ,  
 Modernissime ;  
 E in tel mezo un gran tinazzo  
 De l' altezza d' un palazzo ;  
 Che portasse un stèndardon ,

(\*) *Ad Andrea Memmo nobile Patrizio Veneto deesi  
 il primo pensiero dell' attuale costruzione del Prato della  
 Valle .*

Dove fusse scrito a pegola  
 Con carateri da fabrica:  
 VEGNA QUA CHI VOL VIN BON.  
 Pofardia, che bel spelacolo!  
 Sentiressi che gran strepito,  
 Che farave un mar de popolo  
 Co i so viva festosissimi!  
 Vederessi che concorso!  
 Altro che Fantini e Corso!

Deme, deme quel fiascon:  
 El me par sempre più bon...  
 Oh, cospeto, l'ò svodà!  
 Vegna un altro, vegna in qua.  
 Vegna, vegna... maledeti!  
 Anca qua portè i Fogieti?  
 I me fa vegnir i grizzoli;  
 No gh'è i soldi più strupiai;  
 No i discore che de guai,  
 Che de bombe e de canoni,  
 Che de morti e de ferii...  
 Vostro dano, i m' minchioni;  
 No i me cuca minga mi.  
 Andè pur, andè a la guera;  
 Fève pur tagiar a pezzi,  
 Che mi salvo el centopezzi  
 A l'onor de sta bandiera.  
 Qua ceruele,  
 Là buèle,

**Gambe e brazzi va a le stele!**

**Canonae,**

**Schiopetae,**

**Sabolae...**

**Mi no voi ste baronae.**

**Vedeu là quel caratelo?**

**Que'lo xe'l mio Colonelo;**

**Quele zuche e quei bocai?**

**Quei xe tuti i me Oficiai.**

**Quele tazze e quei fiascheli?**

**Le me spade e i me moschetti;**

**Nè per mi ghe xe botin**

**Più prezioso de sto Vin.**

**Vardèlo,**

**Nasèlo,**

**Gustèlo**

**Provèlo d' inverno, d' istà,**

**Bevèlo scaldà,**

**Bevèlo giazza,**

**Che sempre el troverè una rarità.**

**Dolce amigo, vien qua dame un baso...**

**Mo che odor che rapisse ogni naso!**

**Che cimoza che l' ochio consola!**

**Mo che godi col toca la gola!**

**Altrochè cìocolata e caffè,**

**Che sorbeti, che ponchi, che tè!**

**No gh' è gnente che sia più perfeto;**

**Che me daga più gusto e diletto.**

Sto fiaschetto xe un intrigo;  
 Quela zuca, caro amigo, ...  
 Cossa feu?  
 Cossa diavolo me deu!  
 No v'oi dito el bariloto?...  
 Sì, per crispo, che 'l xe coto!  
 Tanto fa che vaga mi...  
 Pofardi? chi l' à svoda?  
 Zito, zito che ò falà;  
 El xe pien, incoconà.  
 Panza mia, no te far star,  
 Che l' avemo da svodar:  
 Su per un,  
 Su per do,  
 Su per tre,  
 Su su ve,  
 Bravo su!  
 Su, su, su...  
 Maledeta camisiola...  
 Mola, mola,  
 Tagia, mola,  
 Che 'l me vien su per la gola...

Ah Natura tropo stitica,  
 Perchè farme un solo stomego,  
 Un gargato cussi piccolo?  
 Mo perchè, perchè nò farmene  
 Diese almanco, almanco quindese,  
 Lenghi e larghi come l' Adese,



Per trincar come un diluvio;  
 Tracagnar come un demonio,  
 Impenirme come un diavole  
 De sto Vin saporitissimo,  
 Squisitissimo,  
 Arcistupendonazzissimo?

Ma, cospeto, xe un gran caldo!  
 Uh! che caldo, caldo, caldo!  
 Che siroco! vita mia,  
 Va pur là, va via, va via,  
 Beverò debò-bo-boto:  
 Dove xe 'l mio bariloto?  
 Saldi, saldi, casco, casco!...  
 Ve sugheu tuto quel fiasco?  
 Dè qua anca a mi,  
 Che go una sè!...  
 Butè, butè,  
 Svodè, impeni,  
 Cussi, cussi...  
 No più, no più,  
 Tolèlo vu...  
 De qua, de qua,  
 Per carità!  
 Che go el palà  
 Seco, brusà.

Voi trincar come un Todesco  
 De sto Vin stupendo e fresco  
 Fin che vivo e che go fà,

Fin che in panza me ne sta.  
*Star Tais? far trinch, trinch.*  
*Star home de Ghermaine?*  
*Zu trinch, trinch vaine.*  
*Se calantome star,*  
*Zu trinch, trinch, trinch,*  
*Melie custe no provar.*  
*Trinchèn, trinchèn de pone Friulach;*  
*Cent mile pocal, nit imbriach.*

Ola ... o ...

Ola ... o ...

Ola, oe, no toco tera!  
 Vago, svolo, vago in aria,  
 Presto, presto, sera, sera,  
 Sera, sera quei balconi,  
 Che no vaga cussi a svolo,  
 Cussi solo,  
 Fra le nuvole,  
 Dove nasse i lampi e i toni.  
 Sera, sera ...  
 Fra le nuvole ...  
 Lampi e toni ...  
 Cussi solo ...  
 Sera, sera ...  
 Cussi a svolo ...  
 Quei balconi ...  
 Venga Vin, per carità,  
 Che la testa via me va.

Gnente, gnente,  
Alegramente:  
Ogni mal me xe passà.  
Benedeto sto bon Vin,  
Che consola el coresin!

*Vreman trè bon!*

*Alon, alon,  
Alon, Monsù;  
Che fet vu,  
Che no bevè,  
A la santè  
De tuti nu?*

*Alon, bevon, trineon, finchè crepon.*

Oime! cossa mai xe?

Vardè, vardè, vardè;  
La sala s' à imbrìagà!  
La va de qua e de là! ...  
Camina anca i taolini,  
I quadri e i càreghini! ...  
Agiuto, agiuto, agiuto,  
Vardè, camina tuto!  
O dio, o dio, o dio,  
El mondo xe fenio!  
Per mi digo de sì...  
Tegni, tegni, tegni...  
Tegnime, cari vu,  
No posso star più su...  
La tera tremola!

**I travi bagola !  
I veri scricola !  
I muri screcola !  
Tuto precipita !  
Portème in caneva.**



## VOCABOLARIO

*Del Zerghi Veneziani meno noti.*

<b>Andar zo dei bazari</b>	<b>Meltersi grandemente in cal- lera</b>
<b>Badial</b>	<b>Squisito</b>
<b>Bagolar</b>	<b>Traballare</b>
<b>Baronae</b>	<b>Bricconate</b>
<b>Biro</b>	<b>Specie di convulsione</b>
<b>Bisegar</b>	<b>Ricercare</b>
<b>Bonigolo</b>	<b>Ombelico</b>
<b>Butar</b>	<b>Votare</b>
<b>Canevete</b>	<b>Custodie di legno per le bocca</b>
<b>Caratelo</b>	<b>Botticella</b>
<b>Careghini</b>	<b>Seggiolini</b>
<b>Centopezzi</b>	<b>Ventraja</b>
<b>Cimossa</b>	<b>Spuma del Vino</b>
<b>Cocolar</b>	<b>Migliorativo di accarezzare</b>
<b>Cotola</b>	<b>Gonnella</b>
<b>Cucar</b>	<b>Cogliere, corbellare</b>
<b>Damigiare</b>	<b>Gran fiaschi di vetro impa- gliati</b>
<b>Desmissiar</b>	<b>Risvegliare</b>
<b>Dindiete</b>	<b>Gallinacci teneri</b>
<b>Frotole</b>	<b>Baje</b>
<b>Gnognoleta</b>	<b>Ragazza amabile</b>
<b>Grizzoli</b>	<b>Brividi, il freddo della febbre</b>
<b>Godi</b>	<b>Piacere vivo</b>

Incoconà	Estremamente pieno
Late de galina	Cosa squisitissima
Macaco	Specie di scimia
Madalene	Boccalacci
Malsestoni	Sguajati
Missiar	Mescolare
Molar	Sciorre
Panzarini	Panciuti
Pare, sana	Salute, amico; frase marl- neresca
Pizzeghoni	Pizzicotti
Potachiarle	Sporcizie
Rosae	Piati di latte coll' uova
Sbasir	Morire
Scopole	Busse che si danno sul capo colle mani.
Screcolar	Far cre, chrecch
Scricolar	Far cri, criech
Sessola	Picciola pala di legno fatta per asciugare dall' acqua il fondo delle barche. I Marinai se ne servono per bere in mancanza di tazza.
Squele	Ciotole
Strucar	Bere ingordamente
Sustar	Dolersi
Varenta va	Così Dio vi salvi
Zangola	Seggetta.



**LA POLENTA**  
***SCHERZO DITIRAMBICO***

**DELL' AUTORE STESSO**

**DEL VIN FRIULARO**





## LA POLENTA

**B**en venuti, ben venuti,  
Via, da bravi, le se senta,  
Le se comoda qua tuti  
Che xe ora de Polenta :  
Disnaremo qua in cusina ;  
Za le vede che zogielo !  
Co mi go la Polentina  
Questo è sempre el mio tinelo.  
**Ma**, le prego, un momentin .  
Oe , Tonin , fala in, fete  
Sutilete ,  
E impenissi la licarda...  
Varda , varda , .  
Che quel stizzo fa del fumo....  
Sì, per dia , che me consumo  
A insegnarghe a ste marmote!...  
Quele quagie no xe cote ;  
Quela bampa no laora...  
La me 'l creda , Siora Dora ,  
I me fa deventar mato!...  
Parè via de qua sto gato ;  
Sul fogher no voggio intrighi ;

Onzè ben quei becafighi;  
 Tirè zo quele briziole;  
 Deme in qua le cazzariole...  
 Mo che odori che consola!  
 Portè in tola, portè in tola...  
 Cossa fastu? per pietà!...  
 Fame dir de le resie!  
 Te l'ò dito, ti lo sa  
 Che no voggio scalcari...  
 Tropa roba? cossa disele!  
 No le vede? semo in quindese:  
 E po gnente, mi soletto,  
 Picoletto come son,  
 A contarghela da amigo,  
 Più d'un terzo la destrigo:  
 Co ghe xe sta bela zogia  
 Mi devento un parassito,  
 E po mando el rosto, el frito,  
 E i piateli tuti al bogia.  
 La me piase dura e tenera,  
 In fersora e su la grela,  
 In pastizzo, in la paela,  
 Coi sponzioli, coi fongheti;  
 Col porcel, coi oseleti,  
 Co le tenche, coi bisati,  
 Co le anguele per i gati,  
 Co le schile, coi marsioni,  
 Coi so brayi cospetoni;

E po insoma in tuti i modi  
 La Polenta xe 'l mio godi.  
 Co camino per Venezia,  
 E che trovo per le strade  
 Quei che vende Polentina  
 A un soldeto a la fetina, •  
 Che i me diga pur: no cade,  
 Che mi spendo el mio boreto,  
 La gazeta, e infina el traro,  
 E belbelo, belbeleto  
 Me la vago musegando, .  
 Rosegando a boca sconta  
 Cussi calda, cussi onta  
 Soto l' ala del tabaro.  
 Ola, digo, Comareta,  
 No tegni la boca streta,  
 Fe i bocconi un fà più grossi,  
 Che xa qua no ghe xe ossi;  
 Questo è late ben colà,  
 Dove dentro go butà  
 El bisogno de farina  
 Tamisada fina, fina;  
 E po a forza di missiarla,  
 De menarla sora el fago,  
 Come fa ogni bravo cuogo,  
 L' ò tirada una rosada,  
 E a sculieri l' ò cavada;  
 Go butà po su el so zucchero,

El botiro e la canela:  
 Comareta, via, magnèla !  
 Comareta, via, magnèla,  
 Che voi farve tondolina,  
 Grassa come un becafigo.  
 Perdonème se vel digo:  
 Vu se' stada sempre bela;  
 Ma un pocheto magretina.  
 No vedè ste furlanote,  
 Che papote che le ga?...  
 Che montagne!... che arie fine!  
 Quele è tute Polentine.  
 Che al *pajès* le ga magnà.  
 Sto pastizzo xe un oracolo!  
 Che batiro perfetissimo!  
 Mo che ottime tartufole!  
 Che fongheti gentilissimi!  
 Che Polenta ben passada!  
 La par proprio una sfogiada:  
 Vegna i cuoghi con tutti i so sguatari  
 A imparar da sto muso de mamara  
 A formar el pastizzo più nobile,  
 Cussì raro e gustoso che 'l simile  
 No i lo trova se i studia tre secoli,  
 Se la mente e 'l cervelo i se stempera;  
 No i lo trova, son certo, certissimo,  
 Per dio baco! bacon! baconissimo!  
 Digo, Tonin,

No te voi là  
Cussi impalà,  
Cussi incantà,  
Via, sveltolin,  
Dame del Vin...  
De questo nò.  
Oibò, oibò,  
Voi del Friularo,  
Ma de quel bon.  
Voi del mio caro  
Vin del Stradon.

Mo, vardè quel dotoron,  
Che no fa che sprotonar,  
E gnancora el vol magnar  
Via, cavève, slimegoso,  
Stomegoso,  
Andè in camera a studiar;  
Ma con tuto el vostro studio  
Sarè sempre un bel talpon...  
Sì, fradelo,  
Sì, credèlo, stè certissimo,  
Senza i feri del mistier  
Buta mal ogni laorier.

La Polenta xe quel fero,  
Quel bravissimo istrumento  
Che la mente, che 'l talento.  
Fa che sempre diga el vero.  
La xe un cibo lizierissimo,

El più semplice , el più bon ;  
 Che fa pronta digestion ,  
 Che fa un chilo perfetissimo ,  
 Da sto chilo , chè xe un late  
 Che se mua po dopo in sangue ,  
 Nasse un sangue , un altro late ,  
 Che portà po da le arterie  
 Al cervelo , e ai altri visseri ,  
 El li rende in conclusion  
 Facilissimi ,  
 Valentissimi  
 A far tute le fonzion .

Ola , amigo , cossa feuf  
 Cossa diamberne gaven  
 Che no fè che sbadagiar? ...  
 Povereto ... se pol dar !  
 La Polenta ve fa sono?  
 La ve fa malinconia?  
 Andè in leto , caro nono ,  
 Che la testa ve va via .  
 Cossa mai saria de mi ,  
 Che la magno a tutte l' ore ?  
 Ma lo diga ste Signore  
 Se de note fazzo di ,  
 Se son sempre d' un umor ...  
 Cossa disela , Bonsior? ...  
 La Polenta xe ordinaria ?  
 Oe , lighélo che 'l zavarìa .

No la sa che le gran Dame  
 Par infn morte da fame  
 Co le vede la Polenta? ...  
 No la rida, la me senta :  
 Mi le vedo in palco a l'opera;  
 E a le cene dei Casini  
 A magnarla tanto in furia,  
 Sia in pastizzo, o in boconcini,  
 Che par, e ghe lo zuro ben, persbrio;  
 Che no le veda mai graziadedio.

**Ma** no voi più batolar,  
 Vogio un poco respirar,  
 Voi quietarme che son straco ...  
 Maledetto sto macaco!  
 La Polenta inlanguidisse?  
 La fiachisse,  
 La sbasisse?  
 Te becasse cento bisse!  
 No ti sa se i Terazzeri;  
 I Mureri,  
 I Fachini,  
 I Tasini,  
 Quei che dopera le sieghe;  
 Quei che conza le careghe,  
 Quei che ciga *tagialèi*  
 Co i xe vechi i par putei?  
 I xe svelti come spade,  
 I camina per le strade



Che i consola chi li vede,  
 E sì, posso dirte in fede;  
 De Polenta schieta e neta  
 Sti Signori se diletta.

Ma 'l Friularo xe fenio .

Porta , porta , caro fio ;  
 Vegna , vegna fiaschi a furia ,  
 E ogni fiasco strapienissimo ,  
 Che za qua no gh' è penuria  
 De sto Vin prelibatissimo .

Oh , cospeto , che miracoli !

Mo che caro Sior. Checkin !

No la sa se ghe l'ò dito ?

Se no falo l'ò anea scritto ,

Che son mato per sto Vin ...

Varda roba ! vardà ! vardà !

La mostarda ?

Mo che quagie ! mo che tordi !

Mo che odor ! lo, sente i sordi :

Che Polenta ! co ben frita !

La me dà proprio la vita .

Via , Comare , destrighemola ;

Che , per diana , la lo merita ...

Ah ! gavè dolor de denti ?

Malegnazi ! i xe sti venti ,

Fredo e caldo che se chiapa ;

Ma son qua co un bel remedio . . .

Quelo sì , che se la slapa !

Recordèver anca de nu...  
 Sì, Comare, son da vu...  
 Son qua subito... cospeto!  
 Se i ve dol fichève in leto,  
 E mandè a chiamar el medico...  
 Varda, vè, se la va in colera...  
 Nò me provo più a burlarla,  
 Ghe ne magno un' altra feta,  
 Ghe ne sugo una bozzeta,  
 E po vegno a consolarla...

Via, son qua, la se tasenta,  
 Sì, Signora, la Polenta,  
 La Polenta xe 'l secondo  
 Valentissimo rimedio  
 Che destruze, che destermine  
 Ogni mal, benchè profondo.  
 Che 'l sia interno,  
 Che 'l sia esterno,  
 Che 'l sia acuto, che 'l sia cronico,  
 Che l'umor sia malineonico,  
 Sia bilioso,  
 Sanguinoso,  
 Pituitoso,  
 Scrofoloso...  
 Stradeladediavoloso,  
 La Polenta,  
 La Polenta,  
 Sì, Signora, la Polenta

Xe un rimedio che 'l più raro  
 No ghe xe dopo el Friularo.  
 Se ve dol i denti in boca  
 Una feta apena cota  
 Aplichèla  
 Cussì calda a la massela;  
 Fe l'istesso in qualche dogia  
 Che ve dà un dolor da bogia,  
 Sia pleuritica, o sciatica,  
 E ve parlo ben per pratica.  
 Se per caso studiè l'etica,  
 No stè a tor brodi de vipera,  
 De gagiandra, nè de gambaro,  
 Nè tanti altri diavolezzi  
 Che destruze vita e bezzi.  
 A bon' ora ogni matina  
 Fève far la Polentina,  
 E magnèla a scota deo,  
 Se erepè me tagio un deo:  
 Se gavè... ma cossa è stà?...  
 Gran secae! che i vegna qua...  
 Oh! cospeto! benedeta!  
 Sì, dasseno una cassela  
 De Farina bergamasca  
 Che me arriva da Somasca:  
 Digo ben che la go cara...  
 Oe, varde che cossa rara!  
 Che color! che bel zalon!

Me vien fina tentasion...;  
 Cossa distu, panxa mia?...  
 Ah, no, no; metèla via,  
 La faremo un altro di...  
 Mo 'l gran omo che son mi!  
 No me tegno, no gh'è caso,  
 La go sempre soto el naso...  
 Eh! tornèmela a portar...  
 Anca ti ti vol parlar?...  
 Tropo tardi?... varda, mato!  
 Fazzo farla qua in t' un trato.

Catìna, via, Catìna,

Tamisa in quel albuol  
 Sta bela zalolina;  
 Ma varda che 'l granziol  
 No resta in tela semola  
 Che 'l vaga tuto zo...  
 Puro fioretò? oibò,  
 La riesse tropo slimega,  
 E smorta de color.  
 Ma cossa fa quel sior  
 Là solo in quel canton?...  
 To zo quel caldieron,  
 Tachilo a la caena.  
 Mo via, gran Madalena,  
 Va là daghe una man...  
 Oe, zoghistu col can?  
 Mo caro sto putin!...

Destrighite, sassin!  
Fa fogo che la bogia ...  
Cavève, cara zogia,  
No me vegni in t' i pi ...  
Ma, digo, pofardi!  
Quel' aqua va per sora ...  
Xe ora, sì, xe ora,  
Xe ora, sì, tocal!  
Parechieme del sal ...  
Destrighite, Catina,  
Vien qua co la farina ...  
Basta: va ben cussì ...  
Va ben, te'l digo mi,  
Co la xe tropo dura  
La buta ruspia e scura;  
E piena de monari ...  
Alegri, fioli cari,  
No stemo qua a vardarla,  
Xe ora de menarla .  
Via, presto, femene,  
In qua la mescola ...  
Da bravo, Giacomo,  
Da bravo, daghela,  
Da bravo, petighè  
De cuor, de vissere;  
Da bravo, menila  
Con tuta l' anema ...  
Adasio, adasio,

Che la se brustola !  
 Presto , destachila ,  
 E ben unissela  
 Co la to spatola  
 Qua su la cenere ...  
 La va benissimo ;  
 Via , presto , deghime  
 Un fià de fogo ,  
 E rebaltemola ...  
 Mo bravo , cuogo !

Largo , largo , deghe strada  
 A sta nobile matrona  
 Che da tuti xe adorada ,  
 A sta bela Polentona  
 Schietaneta e natural ,  
 De farina , de aqua e sal ;  
 Senza ontume ,  
 Nè grassume ,  
 Senza odor da brustolin ;  
 Senza un fià de pignatin ,  
 Nome fata e rebaltada :

Largo ; largo , deghe strada :  
 Oe , Catina , sona el cimbano ,  
 E ti , Giacomo , compagna  
 Co la mescola e la spatola ,  
 Za ti sa sonar le gnacare ,  
 Che ghe femo onor al merito  
 Veramente imparegiabile

De sta nobile regina.  
 D' ogni piato de cusina :  
 Qua del filo , siora Bortola ,  
 Che voi farla tuta in fete :  
 Mi per mi ghe ne voi sete ,  
 Oto , diese , e po ... chi sa ?  
 Fermi un poco , cari vu ,  
 Che ghe voggio pensar su ...  
 Fermi , digo , pofarsbrio !  
 Lassè star de pizzegarla ,  
 Che ò pensà de maridarla .  
 Ma chi mai sarà el so sposo ?  
 Via , ragazze indovinèlo ...  
 No dasseno el xe più belo ...  
 Mile volte più grazioso ...  
 No 'l trovè gnanca in cent' ani ;  
 Ma ve levo da sti afani :  
 „ Lu xe 'l re de tuti i Vini ,  
 „ Dei Liquori soprafini .  
 Oe , digo , Giacomo ,  
 To quella piadena ,  
 Presto , impenissila  
 De sutilissime  
 Fetine , e fregole .  
 De sta bellissima  
 Polenta vergine ,  
 E po maridela  
 Co un bocalon ,

Del mio carissimo;  
 Prelibatissimo  
 Vin del Stradon.

Su, via, puti, alegramente;  
 Che cantèmo unitamente:  
 Viva Bergamo e Bagnoli  
 Che produse un per de fioli  
 Che xe un per de rarità.  
 Che Polenta! mo che Vin!  
 Che topazzo? che rubin?  
 De più belo no se dà,  
 De più belo no se dà.

Cospetazzo del demonio!  
 Che stupendo matrimonio!  
 Mo che sopra xe mai questa  
 Fata su cussi a la presta?

Ah! se BACO, quel bravon,  
 Quel potente tracanon  
 Che à destruto tuto el Vin  
 Del famoso canevin  
 Del Granduca de Toscana;  
 Fusse qua co la so ARIANA,  
 E col resto del so seguito,  
 Son seguro, segurissimo,  
 Che'l dirave pien de giubilo:  
 Bravo, bravo, bravo, zovene!  
 Va pur là che ti ga el merito  
 D'esser stà ti el primo e l'unico



Inventor fortunatissimo  
De sta amabile sopeta  
Che consola, che diletta:

Catineta,

Comareta ;  
Riosa, Bortola, Lucieta ;  
Via, sorele, tute qua  
A sentir sta rarità...  
Cussi poca, coresin ?  
No lateu quel fantolin ?  
Impenive ben la panza ;  
No gh'è gnente, assicurevelo ;  
Gnente al mondo che la supera  
Per far late in abbondanza .

Ola, digo ; bela fia ,

Me se' molto ingritolia !  
De novembre gavè fredo ?..  
Oh ve vedo, sì, ve vedo !  
Ma no tremo minga mi :  
Via, careta, fè, cussi .

Vegna pur tuti i aquiloni ,

Le più fiere levantere ,  
Vegna el fredo dei Laponi ;  
Co go in panza sto bruetin  
Mi devento un paladin ;  
Mai no tremo, supio e suo,  
Se fusse anca quasi nuo .

Se sta sopa mai va avanti ,

E se meta tuti quanti  
 A magnarla come i risi;  
 Nu vedemo tuti sbrisi  
 I Sartori, i Pelizzeri,  
 Rovinai tuti i Marzeri,  
 No se fabrica più pani  
 Nè da Schio, nè Padoani,  
 Mai più bati, nè londrine,  
 Nè fanèle, nè schiavine;  
 Vien i fassi a vinti al traro;  
 Le manizze va in t' i gatoli,  
 No se mete zo le ventole  
 Gnanca el mese de Genaro.  
 Toni, porta del Friularo;  
 Che la Sposa xe qua sola,  
 Presto, via, che la consola;  
 Co la xe cussi soleta  
 La xe morta, povereta...  
 Pofardin de din, de dia!  
 La gran testa xe la mia!  
 Sì, per crispo, che son mato!  
 Còssa diamberne goi fato  
 A no darghe a sta Sposina,  
 A sta bela Polentina  
 Anca un poto de servente  
 Che ghe staga sempre arente?  
 No gh' è Dama, nè Contessa,  
 Citadina, o Marcantessa,

Benestante, o Botèghiera;  
 In ancuo la Camariera,  
 La Massera,  
 La Calera,  
 Fin la sposa del scoazzer  
 Ga 'l so bravo cavalier.  
 E sta nobile Regina  
 D' ogni piato de cusina  
 Starà sola à muso suto?..  
 No la tegno, nò, da puto.  
 Son qua mi,  
 Son qua mi,-  
*Ui, Madam, Madam, ni.*  
 Sarò el vostro cavalier  
 Pien de stima e de dover;  
 Cavalier mingà de quei  
 Che vol far con tuté i beli,  
 Che sospira, che delira,  
 Che per tute mor e spasema;  
 E i le ga po tute in cesto  
 Co i ga bu quel che i à volesto.  
 No, no, no,  
 No, no, no,  
 Sempre quello mi sarò,  
 E per ti, e per to Mario;  
 Sì, ben mio, te parlo schieto;  
 Anca lu xe 'l mio dileto;  
 Cussì el mondo vederà

Che xe vero che se dà . . .

In amor la bela fiamma

Che platonica se chiama...

**Eh**, cavève, maledeti!

Che bochini da zaleti!..

No permeto gnente afato...

Si, son mafo!

Oh! fradei, no ghe xe caso,

Qua nissun ghe mete el naso,

Sta sopeta è tuta mia...

No, no vogio gnanca femene;

Che le vaga tute al diambene,

No voi darghe zelosia.

**Vien** qua, cara, vien da mi,

Che ti è ti,

Ti soleta

La mia bela gnognoleta,

Si, mio cuor,

Ti xe l'unico mio amor;

Vienme in sen,

Vienme in sen

Che te vogio tanto ben...

**Mo** che union! mo che sopa adorabile!

Che elisir xe mai questo! che balsamo!

Mo che ambrosia celeste! che netare!

Mo che gusto stupendonazzissimo!

Mo che gusto xe quel che lo supera?

Mi per mi no lo trovo certissimo.

Mo che gusto stupendonazzissimo!

Mo perchè no sòngio Dedalo,  
 Che voria svolár in bota  
 Co una bela piadenota  
 De sta sopa sul Parnaso?  
 Ah! sì, sì, son persuaso,  
 Che se Apolo la gustasse,  
 E del so potente spìrito  
 Molto ben el se invasasse,  
 El dirave: adio, Castalia,  
 Dopo tanti e tanti secoli  
 Te abandono, e vago là  
 Dove gh'è sta rarità.  
 No'l sarave un gusto nobile  
 A veder la cusineta  
 De sta pìcola caseta  
 El gran Pindo diventada?  
 Vegnerave a piena strada  
 I poeti da ogni logo  
 A infiamarse de sto fogo;  
 Quei fornei sarave el monte,  
 E sta piadena el bel fonte;  
 El cavalo?.. la mia gata,  
 E l' orchestra? la burata;  
 E quel bon Cantor Divin  
 Co le Muse in compagnia  
 Cantaria,  
 Sonaria soto el camin:

Vardè! vardè! vardè!

Che bel color che go ,

E megio lo farò ,

E megio lo farò .

Me sento , sì , me sento

In fior de zoventù:

Se me volè contento

Dè qua che struca su.

Mo, cara, mo bela!

Mo bela, mo cara!

Mo bona!.. mo rara!..

Mo rara!.. mo bona!

Ti xe stupendona!

Ti se sempre quella.

Mo cara, mo bela!

Mo cara, mo' bela!..

Tasi là, che ti è un cocal!

Sta sopeta me fa mal

Perchè stago in alegria?

Uh, che testa descusia!

Porta, porta, in to malora!...

Porta ancora, porta ancora,

No te far cussì pregar,

Che te pustu inamorar!...

Mo bravon! mo bravo assae!

Bravo assae!

Bravo assae!

Voi sorbirla in do strucae ...

No, ti disi?... no, perchè?  
 Varda, ve ...  
 Varda, ve ...  
 Varda, varda, 'caro ti ...  
 'Songio mi, o no songio mi?...  
 Saldi, saldi, che m' ingosso!  
 No la po ...  
 No la po ...  
 No la posso mandar zè ...  
 Ti l' à fata molto dura!  
 Pofardia! gastu paura  
 Che ghe trova tropo gusto?...  
 Destrighemose, bel fusto,  
 Svoda qua quel bocalon ...  
 Oh! cussi la va benon!  
 Ma benon! benon! benon!  
 Ah! fradeli diletissimi,  
 Che sposini! molto fervidi!  
 Se sentissi in t' el mio stomego  
 Che carezze che i se fa!  
 Mo che salti! mo che tombola!  
 Che urtoncini che i me dà!  
 Sì, careti, sì, godevela ...  
 El gran gusto che go mi!  
 Ah magari seguitasseli  
 Zorno e note a far cussel.

Madamina

Carina,  
 Belina,  
 Via che balèmo,  
 Via che saltèmo,  
 Che se godèmo fin domatina:

Puti, sonè,  
 So .. so .. sonè,  
 Che canto mi,  
 Mi, mī, mī, mī.

E nio, e nio, e nio,  
 S' à maridà Matio,  
 E nio.. e nio ... e na..  
 E .. na..  
 E .. na..

Alto là,  
 Alto là,  
 Alto, digo, pofardia!  
 Che la festa me va via  
 Co sti soni  
 Dei cordoni..  
 Vardè qua ...  
 Vardè qua ...  
 Son in tera destirà!  
 Deme man, toleme su..  
 Su, su, su ...  
 Su, su, su ...  
 Mo co storno... mo co fiaco!..



No capisso, per dio baco !  
No me posso sostentar...  
Eh tornème a colegar,  
E andè tuti via de qua,  
Che sarà quel che sarà,

**I QSELETI**  
***CAPRICIO DITIRAMBICO***

**DI**

**AUTORE ANONIMO**

*rig.*

*Giuseppe Lumano.*

*(See the Index in Vol. XII.)*



## I O S E L E T I

**B**enedeto sia l' Autuno ,  
Benedeta sta stagion ,  
No gh' è tempo più lodabile ,  
Più pregiabile , più bon .

**G**he xe molti , son sicuro ,  
Che dirave : avè rason ;  
Ma per cossa lo diraveli ?  
Per un gusto macaron . .

**I** dirave perchè nasse  
Quel prezioso  
Odoroso ,  
Quel gran netare' divin ,  
Quel' ambrosia , idest el vin .

**Mi** 'l me piase , no lo nego ,  
Ma lo bevo solamente ,  
Per parar  
Zo quel poco de magnar ;  
Ma per altro a cossa far ?

**Xe** lodabile l' Autuno ;  
Ma savèu mo el gran perchè ? . . . :  
Perchè nasse la polenta ?  
Cossa varla cussì sola ?

Eh voleu saver perchè?  
 Perchè tempo no ghe xe  
 Che ne daga in più abondanza  
 La piatanza  
 De quei cari, benedeti  
 Prelibati Oseleti:

No gh'è meglio, v'assicuro,  
 Velo zuro,  
 No gh'è meglio in tuto el mondo;  
 A Berlin, Roma, Parigi,  
 Sul Danubio, sul Tamigi;  
 Sul Mar-Negro, sul .... ma gnente;  
 Mi son stà da tanta zente  
 Da magnoni,  
 Signoroni,  
 Ò magnà dei gran boconi,  
 Ò sentio de tante sorte;  
 E de torte e de pastizzi,  
 Lievri, Cervi e Porchi rizzi;  
 Dei Dentali, Astesi, Toni,  
 Dei Storioni....

Dei .... minchioni!...

No ghe xe gnanca confronto;  
 No ghe dago, se i me prega,  
 Se i me prega in zenochion  
 Gnanca un bocon....  
 Cossa digo? no dasseno  
 No ghe dago a dirlo schieto

Gnanca un beco d' Oseleto .  
 No , ve digo , perchè 'l beco  
 No lo buto minga via ;  
 Guai , per dia !  
 L' è un bocon  
 Tanto bon....

Mi voria che me vedessi ,  
 Quando magno i mi Oseleti ,  
 Come me lo i so becheti  
 Tuti quanti separai  
 In t' un piato picinin ,  
 Che me tegno da yicin .  
 E po dopo che ò finìo  
 De magnarme sti Oseleti ;  
 O che 'l piato go impenio ,  
 Me i destrigo tuti neti ;  
 E che gusto , che i me da !  
 I me fa  
 Richiamar tuti a memoria ,  
 Anzi digo , sul palà  
 I me chiama tuti i gusti  
 Dei Oseleti ch' ò magnà .  
 Oh che gusto maggior d' ogni gusto  
 Se podesse goderlo in eterno !  
 Oh che gran felicità !  
 E pur tanti ghe xe stà ,  
 Che lo ga fin disprezzà .

E ti filosofo

Ti fe Pitagora?  
 E dei Demagora  
 Ti trovarà  
 Che le to legi  
 Le to sempiagini  
 Adularà?

Mi ve digo che , per sbrio ,  
 El più scioco no gh' è stà;  
 Basta dir , che l' à proibio ,  
 Come el tipo d' ogni mal ,  
 A tuti i omeni ,  
 Ai vecchi , ai zoveni ,  
 Fin a le femene ,  
 Fin a le gravide  
 Magnar carne d' animal . . . .  
 Mi per far a l' incontrario  
 De quel testà de cocàl  
 Voi magnarghen fin che posso ,  
 E co più no podarò  
 A la romana me tirarò  
 Duro duro  
 Arente un muro ,  
 E co un deo zo par la gola  
 Darò un ordene pressante ;  
 „ Che qualunque viandante ,  
 „ Che si trovi in quel distretto ;  
 „ Sia nel ventre , sia nel petto ,  
 „ Alla vista di quel dito

„ All' esofago salito ;  
 „ Ex abrupto ceda il loco  
 „ Ai piattelli del mio cuoco . . .

**Siora Aneta benedeta**

La m' à tanto consolà ,  
 Co la ò vista a vegnir qua ,  
 Che no so più cossa dir :  
 Ma podevela vegnir  
 Megio a tempo de cussi ?  
 Proprio se vede che la me vol ben  
 Se la se degna de disnar co mi .

**Qua , la sa . che xe bandi**

El zambon , el salpicon ,  
 L' alisson , el salcisson ,  
 I rosbifi coi zigot ,  
 I rosbinghi coi rolot ,  
 Sia pur semplici , o farsi ;  
 Xe bandidi anca i salmi  
 Xe bandidi anca i coli .  
 No i me staga a nominar  
 Andoliè , anetrè , alafar .  
 Cossa far dei salpurè ,  
 Dei cogliuf e dei purè ,  
 Dei refredi e dei brulè ,  
 Dei aloscè , dei antremè ?  
 Mi no i voggio per i piè .  
 Maledeti quei gonfiet ,  
 Quei sublanç , quei cotlet ;



**Maledeti quei gadij**

**No li voggio sentir più :**

**Che i li fazza via de qua**

**Ma da mi no ghen sarà .**

**Mi no magno altro che Osei,**

**Ma i xe quei ,**

**Co i ghe piase . . . . Cossa oi dito ?**

**Co i ghe piase ? Che dimande ! . . :**

**Eco qua che i portà in tola ;**

**Le se comodi , Signori ;**

**Le se senta tuti quanti ;**

**Via , Comare , feve avanti ,**

**Là vicina al Sior Zaneto .**

**Ela po , Siora Mariana ,**

**Me la voggio sempre arente . . . .**

**Oh la toga . . . . gnente , gnente ,**

**No ghe bado , la li magna :**

**La li magna che i xe boni ;**

**I xe quarti de Frisoni ,**

**Ben conzadi ,**

**Cusinadi**

**In paela**

**Co garofolo e canela ,**

**E co questi i ga conzà**

**Un bocon de pan tagià .**

**Questa xe la mia menestra :**

**No gh'è risi , no gh'è bisi ;**

**No gh'è vena , no gh'è lente ,**

No gh'è sope, nè polente;  
 Nè 'l panizzo, nè l'èrbete;  
 Nè rafioi, nè lasagnete,  
 Cao-de-fiori, macaroni,  
 Cussi boni.

Traria zo per le finestre  
 Ste menestre  
 Negre, rosse, latesine,  
 Zale, verdi, e che soi mi?  
 Che a le tole più stimade  
 Vien portade,  
 Vien magnade  
 Senza gnanca dimandar  
 Cossa diavolo le sia;  
 E chi sa, che porcaria,  
 Che potachì che le xe!

Sè savessi quante volte,  
 Che go visto certi cuoghi  
 A burlar i so paroni  
 Dei boconi che i à magnà...:  
 Qua da mi no l'è cussi,  
 Magnè pur con libertà....

Oh i xe qua co la fritura....  
 Ma le senta mo un pocheto  
 Che gran testa che go mi:  
 No go miga testa dura,  
 Mi me piase ben magnar;  
 Za le lo crede,

E po le vede,  
 Me son quasi destrigà  
 Tuta quella arcimenestra  
 Che qua a tola i ga portà :  
 Onde tornando a bomba  
 ( Dirave i Fiorentini )  
 Mi che veria magnar ogni momento  
 Me son pensà de tior medicamento .

Ma la xe una medicina  
 Che xe mia particular ,  
 Che la serve a maravegia  
 Per farne vegnir voglia de magnar .

Se le andasse per Venezia  
 Ne la megio Specieria  
 No le trova medicina  
 Più operosa de la mia . . . .

Vedeu là quella fritura ?  
 Queli xe tuti Montani ,  
 Oseleti freschi e sani ,  
 Che ga un certo saporeto  
 Amareto ,  
 Che li fa medicinali ,  
 E mi i me fa guarir da tuti i mali .

Ma ghe vol po' la so dosa ,  
 Convien torli in quel tal modo ,  
 E secondo i varj mali  
 I va coti in butiro , o pur in brodo .  
 Per el mal d' inapetenza

I va coti in sta maniera ;  
 Ma perchè po' i fazza efelo  
 No saria gnente una dozena intiera ,  
 Ghen vol almanco do :  
 Si ; vintiquattro Osei ,  
 Co no i xe più che bei ,  
 Ogni poco de panza  
 Che gabia quello che li vol magnar  
 Per medicina i stentarà a operar .

**Mi** lo provo

Co me trovo  
 Co una panza cussi piena ;  
 Che dal peso per portarla  
 La me fà doler la schena .  
 La me toca za sta cossa ,  
 La me tocca molto spesso .  
 Vardè , adesso  
 Ghe saria certi minchioni  
 Che ga in testa de le rane ,  
 Che no magnarla gnanca do boconi :  
 Ma mi gnente ; 'è giusto allora  
 Che ghen magno assae de più ,  
 Perchè i fazza meglio efeto .

**S'** à da dar mo per dispeto ,

Che a magnarghene ogni zorno  
 Go el mio stomego avezzà .  
 Za le sa  
 Se se avezza anca al velen ;

Onde , amici , capì ben ;  
 Che convien  
 Co ste cose  
 Ogni dì cresser la dose . . .

Eco el lessò. Mi no uso  
 De far far certi antipasti :  
 Mi me basta de magnar  
 Dese piati per disnar . . .

Comareta benedeta ,  
 No ve piase i Tordi lessi ?  
 Anca mi son come vu ,  
 Co ghen magno vinti , trenta ,  
 No ghen posso magnar più . . .

Cossa gala , cossa è stà ,  
 Cossa è stà , Siora Mariana ? . . .  
 Gh'è andà un osso in tela gola !  
 Gnente , gnente .

El rimedio xe qua lesto :  
 Presto presto  
 Sto bel Tordo in t' un bocon  
 La lo ingiota tuto intiero ;  
 La guarisse sì da vero :  
 La lo ingiota . . . no la è bona ?  
 Oh per Baco , se pol-dar ?  
 L' à 'l gargato molto streto !  
 Mi lo magno anca per spasso ;  
 No ? la varda . . . ecolo a basso .

Ah via via ,

La xe guaria .  
 La se toga de le Quagie ,  
 Che ga i ossi  
 Manco grossi . . . .  
 Cussì poche, vita mia ?  
 Cossa xe le vinti Quagie ?  
 Le xe giusto un pan da un bezzo :  
 Anzi no , che un panetin ,  
 Benchè el sia più picinin ,  
 Mi el me sazia assae de più :  
 E po gnente ; za la vede  
 Se ghen magno un boconcin ,  
 Che de più no magnaria ,  
 El xe giusto per far forestaria . . .

Vien le Lodole ,  
 Vien le Ledole ,  
 Sì, care, sì,  
 Sì qua da mi .  
 Oh che bone !  
 Benedete !  
 Che stupende , che squisite !  
 Che gustose e saporite  
 Che le xe cussì caldete !  
 Presto , presto tiotene ti ,  
 Che mi resto atento per mi .  
 Ah perchè no goi la boca  
 Granda come una finestra ?  
 Che piacer che gavarìa !

Da una parte meteria  
 Un gran piato de menestra ;  
 Da quel altra el frito , e 'l lessò ;  
 E 'l restante impeniria  
 De sto rosto cussi bon ,  
 E faria tuto un bocon .

**Ma** perchè mò la Natura  
 No ala visto i me bisogni ?  
 Che ghe fosse almanco el caso  
 Per le rechie , per el naso ,  
 Per i ochi , e che soi mi . . .  
 Ma cussi ,  
 Co na boca cussì sola ,  
 Co un buseto in te la gola ,  
 Come mai me sfogarò ,  
 Come mai me saziarò ?  
 Mi no so ;  
 Co sta roba mi no posso . . . .

**Deme** qua quella polenta ,  
 Che la prova , che la senta . . .  
**Ma** , digo mi : xela po stada  
 Nela licarda ben cusinada ? . . .  
 Sì ? va ben : donca dè qua ,  
 Che ghen magna a crepapanza . . .  
 Bona , bona , la me piase .  
 Ma , perdiana , cossa feu ,  
 Quanta mai me ne porteu ? . . .  
 Ah ! convien che me giustifica ;

Sì, Natura, femo pase,  
 Xe dover che me contenta  
 De sta boca che ti à fato,  
 Che la è bona per polenta....

No voi altro, no voi altro;  
 Portè tuto via de qua,  
 Che ò magnà, che ò magnà....

Ma cossa ghe xe là?

Oh che diavolo, Oseleti!  
 Xeli rosti? Ah benedeti!  
 Voi cercar sti Petirossi;  
 Ma sarave un farghe torto  
 Lassar là quei Codarossi.  
 Oh cospeto che Fincheto!  
 Che Caonegro, che Ortolan!....  
 Voi magnarme quel Montan;  
 Anca st' altro... anca sti do;....  
 Ah! sti quattro; e lasso là....  
 Maledeti sti Montani  
 No comincieli a operar!  
 Anca rosti i fa sto efeto?..:  
 Sì, per dia, me xe tornada  
 La mia voglia de magnar.

Ah magnemoli,  
 Destrighemoli!  
 Qua sti Finchi, qua sti Finchi,  
 Sti Frisoni,  
 Qua anca st' altri, che i xe boni.



Oh che otima missianza ,  
 Che i farà ne la me panza !

Ah magari ghe ne fusse  
 Da poder sin che go fià ,  
 Sin che un angolo me avanza  
 Impenirme ben la panza !

Che i sia Celeghe o Perussole ,  
 Che i sia pur Subioti, o Passere ,  
 Che i sia pūr quello che i vol :  
 Mi me basta che i sia Osei ...

Ma , per dia, no xe possibile :  
 No val bezzì, no val trapole  
 Per averghene, per chiaparghene  
 Quanti mi voria magnarghene ... ?  
 A sta ora per comprarghene  
 Gavarò speso un milion ;  
 Gavarò impenio de trapole  
 Quasi cento Possession .  
 Perchè mi go rede e trate ,  
 Go dei rocoli a bizefe ,  
 Go tordere, quagiarie ,  
 Gò passade, ciese, utie ;  
 Go el diluvio, go paloni ,  
 Gavarò mile Falconi ,  
 Altretanti Cazzadori  
 Altretanti Oseladori ;  
 E po dopo ghe son mi  
 Che son bravo più de lori ... :

**Si** dasseno; senza scherzi,  
 Che mi passo qualche ora  
 A quel rocolo là fora . . . .

**Mi** fra tante altre Oselade  
 Me son scielto questa qua ,  
 Perchè posso star sentà ,  
 E ghen chiapo infinitissimi  
 De sti cocoli carissimi .  
 Ma no son po miga mi,  
 Che ghe buto la cestela ;  
 El xe l'omo che sta là .

**Una** volta go provà ,  
 E me son portà benissimo , .  
 Ma ò scoperto che ò un difeto.  
 Quando vedo un Oseleto ,  
 Che xe squasi par chiaparse ,  
 Mi me par d' averlo in boca ,  
 E sentì quel che me toca:  
 Son cussl fora de mi  
 Che no so cossa che fazzo ,  
 Che no so quel che me digo ,  
 Onde invece del cestelo  
 Trago un cigo , mandandoghe un baso ,  
 L' Oseleto se la moca ,  
 E mi resto con tanto de naso . . .

**Ma** co ste minchionarie  
 Me scordava un bon bocon .  
 Oe porteme quel fiascon

Del Friularo del Stradon'  
 Che qua tuti avemo in mente :  
 Che quel Vin cussì ecelente  
 Col so ardor arcigrandissimo  
 De le Muse, arciamicissimo  
 El farà che no sia prìva  
 Sta nostra tola del so bravo **Eviva** :

Oh 'l xe qua sto moroseto !  
 No avè invidia , cocoleti,  
 Che ghen bevo do sorseti,  
 E po torno da vu altri,  
 Benedeti de Oseleti.

Ma via, Friularo ,  
 Da bravo agiuteme'  
 A far sto prindese ,  
 Da bravo , caro . . . .  
 No ti vol? lo farò mi.

Viva donca sta nostra compagna ,  
 Ma viva anca la razza dei Oseleti ;  
 La sanità nostra compagna sia  
 Ma che i Osei sempre sia cussì perfeti :  
 Primavera per nu sempre voria  
 Ma sempre Autuno per sti cotoleti .  
 Nu , vorave che fussimo èternissimi,  
 Ma che Lori po fusse infinitissimi .

Benedeto sto' bon Vin  
 Che fa star zoso el magnar ,  
 Che fa alegro el coresin .

Mi lo voi sempre lodar  
 Fin che el vien in gotesin;  
 Ma co andemo sui do goti  
 El scomenza andar in su,  
 Nè lo posso lodar più.  
 Maledeti sti imbriagoni,  
 Sti porconi  
 Che ga sempre el goto in man;  
 No li posso tolerar;  
 No se pol gnanca parlar,  
 Che no i dise altro che Vin.  
 Sia pur pezo de l' Aseo,  
 Che per lori tuto è bon  
 Perchè i à perso la rason:  
 E po dopo sti imbriagoni,  
 Sti porconi,  
 Sti mastei da solo-spina,  
 Ste barile che camina,  
 Se ghe dassi un Oseleto,  
 I ghe magna mezo el peto,  
 E po i dise: oh! go magnà.  
 Eh che i vada.... ma no serve,  
 No me vogio altro inquietar.  
 Deme qua quel matrimonio....  
 Quel pastizzo: ... maledeti!  
 No savè che la polenta  
 La xe sposa dei Oseleti?  
 Mi me par che ve l' ò dito,

Che nol xe vero disnar  
 Se no gh'è la so polenta,  
 Quando Osei s' à da magnar.

**Ma** polenta schieta.... oh giusto,  
 No ghe trovo nessun gusto....  
 Questa è fata col butiro,  
 La ga drento mile sorte  
 De Oseleti saporiti,  
 Parte rosti e parte fritti,  
 Che 'l me cogo a lento fogo  
 Ga lassà che i se consuma  
 Tra le tartufole le più pregiade,  
 E tra i garofoli-e-le nescade.

**Oh** de questo mo ghen magno  
 Per saziarme un pochetin;  
 Anca vu, cara Comare,  
 Anca ela, sior Tonin...

**Mi** no so po cossa dir,  
 Quando che no le pol più  
 No le voggio altro sforzar.  
 Mi so che ò una gran voglia de magnar....

**Oh** bela, si dasseno!  
 Ve fe le maravegie?  
 Questo vol dir, che poco  
 Sui libri avè stracà le vostre cegie.  
 Mi mi ve dirò, mi  
 La so vera rason:

**Disème, aveu mai leto el Sior Platon?**

Vedeu , lu dise : che gavemo tuti  
 Al nasser nostro 'na costelazion ,  
 Anzi una stela , e questa fa che astuti  
 Alcuni sia , che un altro sia un minchion ;  
 Che a chi ghe piasa i vovi , a chi i persuti ,  
 A chi piasa sentir criar : oa ,  
 A chi sentir sonar tarapatà :

Quelo vorave andar sempre a cavalo ,  
 Questo sempre in carrozza , e st' altro a piè ,  
 A chi ghe piase molto el color zalo ,  
 A chi ghe piase el bianco , a chi el tantè ;  
 Chi vol brodo de vipera , o de galo ,  
 Chi sorbeti , chi ponchi , e chi caffè ,  
 E questo per l' infusso ne succede  
 Ghe ga le stele che su nu presiede .

Oltre de questo el dise , che le fa  
 Più stele unite insieme una figura ;  
 Altre d' un Gan la forma le ne dà ,  
 Altre d' un Porco , o pur d' una Creatura ,  
 Altre un gran Asenon come che va ,  
 Altre un Beco o una Cavra le figura ;  
 Altre un Cavalo , una Formiga , un' Ansa ;  
 Altre una bela Puta , altre una Manza .

Cussì se dà che sempre nu se tremo  
 Un animal , o l' altro a somegiar ,  
 E con quel nome spesso nu chiamemo  
 Tuti quei che se vol rimproverar ;  
 Ma lassème che diga : no dovemo

Dir guente nu sū sto particular;  
 Perchè, cossa ghen pol Sempronio o Tizio  
 Se'l porta in lu de la so bestia el vizio?

Bisogna anca saver che tuti nu  
 Soto una sola stela semo nati,  
 E che za ghene vol molte de più  
 Per formar sti animai come i va fati;  
 Per questo molti e molti se tol su  
 D' Arpie, de Porchi i titoli onorati,  
 Quantunque tra le stele no ghe sia  
 Altro che un solo Porco e che un' Arpia .

Ma per tornar a quel che ve diseva,  
 Sapiè che in mezo a tuti sti animai  
 Ghe xe anca el Lovo; infati el ghe voleva.  
 Ghe xe anca Osei; se no i ghe fusse, guai!  
 E mi nato sarò co se vedeva  
 I Oseleti col Lovo a star tacai,  
 E la voglia che al Lovo ghe sarà  
 Venudo allora el m' à comunicà..;

Ma qua cossa se fa  
 Cussì senza magnar?  
 Me par che gh' è de l' altro da portar.

Ah el xe qua l' intingoleto  
 Tuto quanto Becanighi:  
 Ah el gran otimo Oseleto !...:  
 Oh le magna po, che questo  
 El xe fato qua per ele . . . .  
 No le vol? proprio mi resto

Che le gabia cussi presto  
 Impenio le so buele .

**Ma** pacienza . . . . za sta roba  
 No andarà butada via ,  
 Che ghe xe po finalmente  
 El rimedio in boca mia .  
 E vu altri , Servitori ,  
 Fin che magno i Becafighi  
 Portè un piato anca per Lori ; . . .

**Ma** vedo che nessun  
 Ga voglia de magnar :  
 Se i porta un altro piato  
 Melo magno mi solo ,  
 E i altri sta a vardar ;  
 Onde no voi sta cossa ;  
 Voi che magnemo tuti ,  
 Donca portème i fruti .

**Ah** benedeti !  
 No gh'è fruti più perfeti ;  
 Più stupendi , più 'squisiti ,  
 Più gustosi e saporiti .

**Sento** a dir de l' Ananà  
 Che el xe un fruto arcistupendo  
 ( De sto fruto no m' intendo  
 Nè ghe n' è gnanca magnà ) ,  
 Ma , i me dise , che consiste  
 Sta stupenda rarità ,  
 Perchè in lu sto fruto unisse



Vari gusti ch' altri ga ....  
 Ben ... i mi no ghe n' à vari,  
 Noi ga quei dei fruti soli,  
 Ma quei tuti che provar  
 Pol chi à voglia de magnar.  
 Sì, Signori, i ghe xe tuti.  
 Via, ve digo, portè i fruti....

Oh, le diga, oi minchionà?  
 Le ghen magna, che i xe tuti  
 Picolini,  
 Frescolini  
 Tendolini  
 I xe tuti Lugarini....  
 Quattro soli! Oh cospeton!  
 Me faressi andar in colera....  
 Se sti trenta no magnè,  
 Recordève, mi v' aviso,  
 No ve vardo più in tel viso....

Anca vu, via, Comareta,  
 Tolè zo trenta, quarantà.  
 Anca ela, Siora Aneta,  
 Za per mi ghe ne xe ancora  
 Qua de fora.

Questo è un piato predileto,  
 Onde al cogo gh' è ordinà,  
 Ch' el ghen meta dopo questi  
 Per mi solo una speada  
 Più del doppio de quei là....

**Ma** no xelo un gran piaser  
 A magnar de sti cosseti?  
 Mi me par giusto d' aver  
 Un scartozzo de confeti . . . .  
 Cossa è stà? chi xe venudo? . . .  
 Una letera? dè qua . . . .  
 Oh còspeto! . . . . le perdona . . . .  
 A un disnar son invidà . . . .  
 Mi convien che vada subito;  
 Mi me dol lassarle qua,  
 Ma le vede la ocasion  
 Per ancuo porta cussì . . . ;  
 El xe pranzo che i lo fa  
 Nel casin de mio Nevodo;  
 El me scrive che abbondanza  
 De Osoleti ghe sarà . . . .  
 Ah no posso ricusarli!  
 L'è un sconzuro tropo forte;  
 Perchè a mi i me piase massa!  
 Le permeta che le lassa  
 Perchè presto i porta in tola . . . .  
**Ma** no son miga un balordo;  
 Me ricordo, me ricordo . . . .  
 Oe porteme presto, presto  
 Anca el resto:  
 Sì, anca st' altri Lugarini . . . .  
 No i xe coti? Oh pofardia,  
 Che sfortuna xe la mia! . . .

**Ben**, senti: da qua do ore  
Sperarla d'aver disnà;  
Tornerò subito qua ....  
Se no i trovo coti in punto;  
Se i xe fredì o brustolai  
Ve farò pagar la 'pena  
Ben de tuti sti pecai ....

**Ma** mi vado, che za se  
Che sta cara compagna  
La xe tanto e tanto bona,  
Che la perdona  
Sè la lasso cussì sola ....  
Vado a tola, vado a tola.

**LA ZUCA**

***D I T I R A M B O***

**DEL CO. AB.**

**MARC' ANTONIO CAVANIS**



## IN LODE DE LA ZUCA

### *DITIRAMBO*

**Q**uanto è vário 'l pensar! Chi se inamora  
De un dolce che po in fondo xe velen;  
Chi de un bel fasco pien,  
Altri, per so malora,  
Spasema per i bezzi;  
Chi se faria squartar in cento pezzi  
Per arivar su qualche caregon,  
Chi fa l'amor a un qualche medagion;  
A chi ghe piaserave un abitin  
Curioso; galantin,  
Ben fato, sveltolin,  
Da goder el morbin;  
Chi se diletta de un bel chitarin,  
E chi de un cagnolin;  
E per vegnir al fin  
In t' una Sechia un sior s' à in amorà,  
E in so lode un bel libro el ga stampà.  
**Mo** donca no bisogna  
Che me vergogna  
A dir che mi me sento inamorà;  
Brusà,

Invasà,  
 Copà,  
 Piuchè insatanassà  
 Per la Zuca che indora le baise;  
 E che Vedel da Ghiora ancuo se dise;  
 Za me lo vedo qualche bel umor  
 Che senz' alcun rossor  
 Me sbufona sul viso e che me fazza  
 Co un muse da lirazza  
 Do, tresento sberlefi da smorfoso...  
 Via rognoso,  
 Via tegnoso,  
 Stomegoso,  
 Schizzignoso;  
 Via de là de carognoso;  
 Via, fate in là, che se me salta un lampe  
 Co meza Zuca mi te cavo el stampo,  
 E po' fazzo una Statua co un cartelo  
 Aciò che tuti te cognossa a pelo,  
 E i sapia che ti xe colà che abomina  
 La Zuca che dà vita a tanto popole.  
 Allora vardete,  
 Varda che i fulmina  
 I sassi e i ravani,  
 E i pomi a fregole  
 Tra i fischi orribili  
 De un mar de popole,  
 Che te considera

Quel omo stupido

Che no ga

Nè palà,

Nè un fià

De onestà

Per un pasto gentil da tuti amà:

Si, la Zuca, la Zuca, la Zuca

Sia santa o sia baruca,

O sia Zucoi col manego,

O Zuche anca salvadeghe,

L'è un magnar da strupiai che fa bon pre

Fa tanto de panzon, purga i cocò,

Fa belo el viso, ve dà forza a i pl,

E consola el buelo per tre dì.

*Oh! l'è un magnar da porchi in la mastela:*

Che stolidà bardela!

Mo gran langue! gran teste! gran scioconi!

Mo no vedè come con quei bocon!

Giusto i porcei ve vien come tordeti,

Grassi, dolci, tondeti,

De un gusto prelibato e soprafin;

Che ve consola proprio el coresin.

Del porcelo xe bon anca el zampin,

Xe un balsamo el coin,

Xe un botiro el sgrugnieto;

Un late xe el panzeto;

Del porco i fa luganega,

Del porco i fa le brombole,



Del porco i fa i holdoni;  
 Se magna el pel, le zate e i sporteloni.  
 L'è bon rosto in speo,  
 L'è bon a scotadeo,  
 E grasso e insenetio,  
 E bogiente e indurio,  
 E dopo degerlo.

E pur l'è tuto pur, e struca e struca  
 Tuto sugo de zuca

Quel che ga fato el chilo;  
 Quel che ga fato el grasso;  
 Quel che l'ha messo in filo,  
 E ch'el fa deventar stupendonasso.

Mi che no diga ben? sì che ò da dir,  
 Che la Zuca xe quanto un elisir  
 Che dà la vita ai morti, e fa morir  
 Tuti i cancri,  
 Tute le fistole,  
 Tute le racole  
 Dei mali che vien fuora  
 Dal vaso de Pandora.

Co me vedo in t' un campo semenà  
 De Zuche ben zalone in quantità,  
 Za se me averze el cuor, perchè me par  
 Proprio de caminar  
 In Spizieria de ogni fedel Cristian  
 Dove chi xe malà se trova san.  
 Trè zo quel sevizial,

Che a chi ga le moroidé el ghè fa mal,  
 Se ve volè purgar tolè sto toco  
 De Zuca rosta che anderè de oco,  
 Magari le buele,  
 Che za salvè la pele.  
 Gaveu la rognà, le variòle, el gosso!  
 Tuto calor che za ve buta in fosso.  
 Via no tolè potachi!  
 Cremor de tartaro;  
 Manà potabile,  
 Mercurio fervido,  
 Negro rabarbaro,  
 Cassia che stomega,  
 China che tossegà,  
 Zuca tolè, che la indolcisse el sangue,  
 Tolè Zuca per pan, per companadego,  
 Zuca, Zuconi, e sarà tolto el radego;  
 Frita, lessa, arostia, che proprio al fin  
 El sangue ve farè da colombin.

Ve fa pecà i Spezieri  
 E ve impeni de scoazze  
 Per darghe le lirazze?  
 Oh mati vivi e veri!  
 Fidève pur dei Medeghi,  
 Crèdeghe a le so massime,  
 Cerchè pur le so visite,  
 Struzève pur le vissere;  
 Ma fe pati col Nonzolo,

Che presto el Dotoron  
 Ve buta a tombolon.  
 Mi certo no me tegno  
 Perchè go tanto inzegno  
 Da capir el gran ben che fa la Zuca:  
 Gpissun no me imbarluca,  
 Ma salto co fa un mato,  
 Sbriso co fa un bisato,  
 Tiro fora la lengua, e cigo alturio  
 Finchè me bagno el beco co quel balsamo!  
 Coss' è, coss' è? sento ciger Tonina...  
 Fermi là... zito... tasi, caro ti,  
 Lassa che senta... xela polentina?...  
*Oh co bona, oh co rara!... ah!... so qua mi*  
 Mi no me tegno... Zuca schieta e meta  
 La Zuca benedeta...  
 Largo, fe largo... fate in là furbazzo...  
 E ti budeladazzo  
 Vustu una slepa, o vustu una peada?...  
 Xe andà el Tabaro, resta la Velada...  
 Oe, da la Zuca, presto corè qua,  
 Abiè carità,  
 No go altro fià,  
 Me son sfadigà,  
 Me son scafmanà,  
 Perchè no andè in là:  
 Oimeì, me consolo  
 Ghe so arivà a svelo;

So qua , me sbabazzo ;  
 No co la man , voi meterghe el mustazzo .

Si , coi deolini

Se magna i confetini ,  
 Col pironcin se slimega ;  
 Col sculierin se becola ,  
 Ma co piase no gh'è tanta pazienza  
 Da magnar a batua come un Celenza .

Qua un trareto , do trari , una lirazza ,  
 Tiolè i bezzi , la borsa e le scarsele ;  
 Ma lassème slapar che me sbabazza ,  
 Perchè se me consola le buele .

Qua una Zuca , do Zuche , tre Zuche  
 De sante e de baruche ,  
 Qua che beva sta broda ,  
 Che sorba sta papa ,  
 Che tuta la slapa ,  
 Che tuto me goda .

Via presto scàldeme ,  
 Via presto sàzieme ,  
 Via presto indòreme ,  
 Via presto imbàlseme ...

Oh che papa ! che broda ! che gusto !  
 Bona per nu , che no portemo el busto ...  
 Ma go sto comesseto  
 Che me strenze un pocheto ...

Aqua , me ingosso ,  
 Deboto me strangolo

E pur no gh'è ossò ...

Mé vien ...

Me vien ...

To dano: te l'ò dito che tel puso;

Va là porco, va là, làvate el muso.

**Ma** intanto, e cussì

Gh'è Zuca per mi?

Oimeì l'è finia

Gh'è apena la tola;

No gh'è scalcarla,

Chi mai me consola?

Oimeì no go spirito,

I oèhi me bagola,

Le gambe fa giacome

El cuor se me sbrodega

Perchè de sto oro

Me manca el restoro.

Se me volè vivo no me fè aspetar

Un burchio de zuche vegnìme a portar.

**Vegnì**, vegnì presto,

Tonina ve aspeto:

Ghen fazzo in brueto,

Ghen fazzo col pesto,

De fritè co l'ogio,

De fritè col struto,

Ghe meto el cerfoglio,

Ghel meto da puto

S' un loco de lessa:

Ghen brustelo in forno  
 Un quarto, ma in pressa,  
 Po subito torno  
 A frizerla in techia  
 Intanto coro a casa che i parechia.

Olà, desmissiete,  
 Todero, averzeme;  
 Fora le piadene,  
 Via presto fregHEME  
 Caldere, e lustreme  
 Fersore e techie,  
 E i piati indoreme  
 Che à da vegnir la Zuca a far bancheto  
 E tuto ga da esser lustro e neto.

Fa presto, fa fogo,  
 Ghe vol quatro bronze;  
 —Ti, galo, dà logo...  
 Mi vogio ben conze  
 Le Zuche in desfrito  
 E ben brustolada  
 La rosta pulito;  
 Ga da esser panada  
 La lessa, ti sa:  
 A le curte a pontin come che va.

Oh che godi! son proprio un paladin  
 Co me imbalsamo el cuor co sto broetin;  
 Che risi? che carname? che caponi?  
 Tiolè risi; i me par quei pignoleti,

Che ve puza sti mestri manestroni:  
 Burlala, siora Dora? oh! i so manzetti  
 So che i ghe piaserave, e i so castrai,  
 Ma sieli pur frustai,  
 Solamente i ze boni per i cossi;  
 Vòi dir per i Becheri; mezi bezzi  
 I xe butai in canal; che diavolezzi!  
 I ve dà meza polpa e mezi ossi,  
 E po che polpa? o la xe dura, un legno,  
 O la xe papa a segno  
 Che la par degerla,  
 O la xe insenetia,  
 O la xe tuta grasso,  
 O sempia come un sasso,  
 O la spuzza da lispio; e po in tinelo  
 Ga d'aver anca el gato el so piatelo;  
 Perchè co sti bei lardi anca i ve zonta  
 Un toco de slambrichio sempre in zonta.  
 Via la responsa, siora Dora amabile:  
 Cossa serve i sberlefi? i me fa stomego.  
 La digà pur, se la ga fà, la squaquara...;  
 Voriela dir: me piase i caponcini?  
 Cari quei bei bochini!  
 Tiolè un Capon, mezo ducato el val;  
 Curèlo, governèlo, l'è un feral.  
 Ch'el sia anca bon: topa vel magna mezo  
 El gato, el can; cavèghe le buèle,  
 Batè el corbame, curè ben la pele,

Oh se qua andemo pur de mal in pezo!

Metè da banda i ossi : cossa resta ?

Vu fe dezun , e 'l cagnolin fa festa :

**Vardè** che baronae !

Vardè che matitae !

Tanto darghe a le bestie quanto ai omeni !

La Zuca no che no fa sti spropositi :

Spendo un traro , e sto traro è tuto mio ;

Spendo un ducato , e 'l magno tuto mi ;

So quel che compro , e co la xe cussi

Dopo che go comprà no pago el fio .

**La** Zuca no ga ossi , e no ga spini ,

No la xe dura , no la xe panada ,

No la xe seca , nè destemperada ,

No la spuzza da lispio ; al fin dei finì

La ga el color de l' oro , e tanto basta .

**Mo** che gran bona pasta !

Perchè no nassistu

Solo in America ?

Che sior Vespucio

Su più de un Codice

Te faria celebre ,

E vederessimo

Sora l' Oceano

Drio del ta merito

Corer intrepide

Nave e Trabacoli

Del Turco barbaro ,



Del gentil Veneto,  
 De la gran Aquila,  
 E de ogni Popolo;  
 E sentiressimo  
 Venderte a fregole  
 A Dame e a Nobili,  
 E ai più gran Prencipi.  
 Allora ti saressi rarità,  
 Ma per mi ti fa meglio a nasser qua.

Che providenza!

Sta bona droga venze tuti i intopi,  
 La nasse in tuti i campi, e sta semenza  
 Se rampega su i muri e va su i coppi,  
 La regna in tei piteri, e squasi squasi  
 La ve nasse in pignata;  
 Qua la mia cara tata,  
 Vienme qua, che te daga cento basi.  
 Oe? cossa vedio, el burchio xe a la riva...  
 Oh za me la sentiva,  
 Proprio el cuor lo diseva, e proprio el naso  
 Se me strupiava per l'odor soavissimo  
 Che quel fiascon de zucchero,  
 Che quel balon de netare,  
 Che quel peaton de balsamo;  
 Manda per l'aria: oh! certo mi no tase...  
 Presto Tonin e Gasparo,  
 Piero, Martin e Prospero,  
 Polo, Chechin, Agapito

Vegni zo a tombolon ;  
 Strupievè che n' importa ,  
 Vegni zo in prucission ,  
 Trè zoso anca la porta ,  
 Saltè zo del balcon ,  
 Rompè pur anca el muro ,  
 Trè zoso anca la casa ,  
 Ma se volè che tasa  
 Vegni a tior sto tesoro ,  
 Metemèlo al seguro ,  
 Ma presto presto presto ,  
 Se no mi qua ve muoro .

Oh bravi ! me consolo

A vederve qua tuti ;  
 Bravo Tonin : co alesto !  
 Oe varda ti , che ti ghe stornai el colo . . .  
 E ti ? cossa ghe vol ? tirela in tera . . .  
 Cossa fastu , baron ? xela una piera ,  
 Che ti ghe sapi su co quei stalfoni ? . . .  
 Oh bravi , bravi puti  
 So contenton : mo proprio se' omenoni .

El magazen

Xe tuto pien ;  
 Adesso manca el megio , che xe ora  
 De impenir la pignata e la caldiera ,  
 La techia e la fersora ,  
 La grela , l' antianelo e la tortiera ;  
 Far che la Zuca bogia ,

Far che la Zuca frisa ,  
 Far che la zira in speo ;  
 Che la salta in pignata ,  
 Che in techia la se cata ,  
 E che la crostoliza ,  
 E che se mostra a deo  
 Tutto sto liogo ben fodrà de Zuca :

Via testa mamaluca

No te gratar la roгна ,  
 Qua xe da bulegar , laorar bisogna .  
 Vogio dar una bona papolada ,  
 E far de zuche sole una disnada .

Tiòghene una , e fala in boconcini ,  
 Che faremo manestra stupendona ;  
 Un' altra a quarti fighela in caldiera ;  
 Quela cussì zelona  
 Metila in forno tuta quanta intiera ;  
 E questa in fregolini  
 Metila in techia , che cussì pulito  
 Gha xe manestra , lessò , rosto e frito .

Oh che consolazion !

No gh' è meglio bocon .  
 Che cuoghi a la Francese ?  
 Che piati in *desossé* ?  
 Fe tute ste gran spese ,  
 E tossego comprè .

I polastrei ve fa vegnir la gota ;  
 Spendè bezzi in carname ,

E po ve vien mal putrido;  
 I brui ve lassa fame;  
 La roba dolce in bota  
 Ve fa nasser i vermi; un altro piato  
 Ve fa vegnir el fiato;  
 Vardei sti crapuloni,  
 Gnanca de star in piè no i xe più boni,  
 I è Lazareti, vardèli pur vardèli,  
 El so tropo magnar li magna eli.  
**Ea** Zuca no che no la fa malani;  
 No la fa gota, no la fa sunanza,  
 La imbalsama la panza,  
 La fa far bela copa,  
 La fa papote grasse,  
 La ve prolunga i ani,  
 E al più zoso a le basse  
 La cava qualche stopa  
 Produsendove un po' de manzarella  
 Che al fin dei fini purga la buela.  
**Oh benedeta!** la manestra è cota,  
 Xe a l'ordine la lessa, e anca la rosta;  
 Ga tuta la so crosta  
 Quela che i à messo in techia a volta rota  
 Donca corèmo,  
 Magnèmo,  
 Sguazzèmo,  
 Slapèmo,  
 Crepèmo.

Mi la magno co i ochi e co la boca ,  
In panza la me sfioca ,  
E proprio se me indora le bucle .  
Co' cara ! co' bona !  
Co dolce , delicata e stupendona !  
Me luse infin la pele ,  
Me bulega de drento el coresin ,  
Quante cosse in to lode voria dir !  
Ma no posso tocarlo sto cantin ,  
Perchè dal gran sorbir  
Sta bona papa , el corpo s' à sgionfà ,  
E me sento un tamburo , e no go fià .

**COLLEZIONE**  
**DELLE MIGLIORI OPERE SCRITTE**  
**IN DIALETTO VENEZIANO**

---

**VOLUME VI.**



°  
**APOLOGHI**

**D I**

**FRANCESCO GRITTI**

---

**VOLUME SESTO**

---

**V E N E Z I A**

**AL NEGOZIO DI LIBRI ALL'APOLLO**

**M. DCCC. XVII.**

*Dalla Tipografia di Alvisopoli*





## PREFAZIONE

**S**in dall'anno 1815 si pubblicarono per la prima volta co' torchj della nostra Tipografia le Poesie di Francesco Gritti insieme raccolte, e furono precedute dalla Vita di lui, scritta elegantemente dal ch. Professore dell'Università di Padova l'Ab. Antonio Meneghelli. Ora si consegnano esse nuovamente alla luce, ma con tali differenze da raccomandarsi questa edizione per nuovi pregi suoi proprii. Tra gli Apologhi più venusti dell'Autore si è giudicate di scerre i venustissimi, e se n'è assai migliorata la lezione. Agli Apologhi tiene dietro la spiritosa sua Favola Chinesa, intitolata *il Brigliadoro*, che ora esce

in luce per la prima volta, e forma il secondo Volume destinato alla Raccolta nostra.

Nacque il Gritti in Venezia il dì 12 di novembre 1740, e indossata a suo tempo la toga patrizia, sostenne sin al cadere della Veneta Repubblica un onoratissimo posto tra i Giudici ne' Consigli de' Quaranta. Studiò con ardore le lingue specialmente viventi, e scrisse con varia fortuna diverse Operette nelle quali il riso e la gioia scherzano sempre festevoli. Nel dì 16 di gennajo dell'anno 1811 egli pagò l'inevitabil tributo dopo avere spesi i suoi giorni nella imperturbabilità del filosofo, che se pure viene colto dai guai della vita non manca giammai di maschia virtù in sostenerli. Molto verace è la pittura che dell'umore del Gritti ci ha lasciata il suo illustre biografo. „ Con un aspetto grave, „ taciturno, pensoso, più amico della solitudine che del conversare, avea sortito un' anima lieta e scherzevole.... Più

„ dormiglioso che desto, molto raccoglie-  
 „ va dagli altri e poco dava del proprio....  
 „ Quando si facea narratore il riso e la  
 „ gioia scherzavano sul volto di quanti  
 „ lo udivano, ed egli solo così se ne sta-  
 „ va in sul serio, che l'avresti creduto  
 „ un nuovo Uticense; il quale contrasto  
 „ fra le persone e le cose addoppiava mi-  
 „ rabilmente l'effetto .... Non v'era un  
 „ solo fra i tanti Apologhi dall'aurea sua  
 „ penna dettati che non gli fosse presen-  
 „ te .... Visitava molte società nella sera  
 „ stessa, o più sere vivea colla ricca so-  
 „ cietà de' suoi pensieri .... Era severissi-  
 „ mo giudice di se e de' suoi scritti; e  
 „ non degenerare dagli Ariosti, dai Tassi,  
 „ e dai Metastasi, spendeva più mesi nel  
 „ ritoccare quell' Apologo che forse avea  
 „ in pochi istanti dettato .”



## LA VERITÀ E LA FAVOLA

**S**tufa de star in pozzo ,  
Nua come Dio l' à fata ;  
La Verità s' è messa un dì a viazar ,  
Ostinada a voler per tanto tempo  
Viver là drento , e respirar quel' aria  
Soteranea , mal sana , e no magnar  
Che sansughe e lumaghe ,  
L' aveva veramente  
Cambià ciera e fatezze ;  
La pareva a dretura  
Un scheletro scampà de sepoltura .  
Trovandola per strada  
Zoveni e vechi se la fava a gambe ;  
Oe , no ghe gera un' anema  
Che ghe sporzesse un strazzo de gonèla ,  
O un per de scarpe rote ;  
Nissun gh' à dito mai : vegni , sorela ,  
Magnè un boccon , fermève qua sta note .  
**Gh'**è passà un dì vicin per accidente  
La Favola , che giusto andava al fresco ,  
Ma yestia ! ... sì , minchioni !

Merli, fiori, penachi da zechin  
 Ghe fava su la testa baldachin;  
 E un andrèt da gala  
 Co le maneghe larghe e coa prolissa;  
 Sparso de fiori d'oro,  
 De perle, de brillanti,  
 Col sol da drio, co la luna davanti,  
 Ghe decorava tuta la persona,  
 Che la pareva proprio una bissona;  
 Tuta roba za falsa, ma d'un brio,  
 D'un fogo, d'un splendor  
 Da lassarghe su i occhi. Co la vede  
 Quela mumia col sesso in confidenza;  
 Co la la riconosce,  
 La fa tre passi indrio per la sorpresa:  
*Ti ti xe mia sorela, Verità?*  
*Senza camisa? Cossa fastu là?*

La ghe risponde: — *Ti lo vedi ben,*  
*Son qua che me impetrisso;*  
*Sarà un' ora che domando a chi passa*  
*Una strazza, un fenil, tanto che possa*  
*Coverzermè e dormir; tuti me scampa,*  
*Fazzo a tuti paura. Ma l'è chiara*  
*Co le done xe vecchie le à finìo*  
*Fina d'esser più prossimo,*  
*E grazia granda se i ghe dise, adio.*  
 — *Ti è per altro più zovene de mi*  
 (Torna a dirghe la Favola) e pur tuti,

No fazzo per lodarme, me riceve  
 In casa, me carezza, e so tratada  
 Per tuto da signora ... ma, sorela,  
 Perchè te vien mo in testa de mostrar ...  
 De diana! almanco tor  
 Do fogie de figher. Nua per la strada?  
 Petete i to talenti,  
 Dove gastu el giudizio? Oh, basta, senti:  
 Femo negozio insieme ... Vien mo qua,  
 Fichete drento, involzete -  
 Nel mio manto real, e a passi uguali  
 Caminemo d'acordo. Per el tagio  
 De le scarsele, o fora per le maneghe  
 De trato in trato ti à da far baossete;  
 I filosofi, i savj  
 Che fin adesso t' à voltà le spale,  
 Vedendo che la Favola  
 No xe che 'l scorzo de la Verità;  
 A brazza averte te riceverà;  
 E ti stessa dai richi e dai puteli,  
 Soliti co i te vede a scampar via,  
 Ti sarà ben acolta in grazia mia.  
 Cussì servindo al gusto de ciascun  
 Divideremo el fruto,  
 Ti dei matezzi, mi de la rason,  
 Passaremo per tuto,  
 E faremo, sorela, un figuron:



## L'AVA CHE BECA

**B**ela, zovene, galante,  
Leterata, ogni matina  
La marchesa Belaspina  
Core subito a taolin.  
Là mo a caso ghe xe un spechio,  
E con lu, da quella via,  
La fa scola de magia  
Ai so occhi, al so bochin:  
Mentre un dì cussi la studia,  
Vien un'Ava da de fora,  
Che tornava fursi allora  
Da la fabrica del miel.  
La la sente, la la vede  
Spaventada, povereta!  
La trà un cigo: *Ajuto, Beta,*  
*Presta, Brigida, Michiel!*  
Core tuti: *Go qua un mostro*  
*Co le ale, co la bava:*  
Tuti core: ma za l'Ava  
Gh'à un lavreto, oh Dio, beca:  
La marchesa casca morta,  
Per no dir in svenimento;

Beta, lesta come un vento ,  
 S' à quel' empia za cuçà.  
 La voleva là schizzarla ,  
 Vendicar la so parona ,  
 Ma la birba in man ghe intona  
 In bemol un dolce: *Ohimè!*  
*Mi ò credesto* ( chi sa a quante  
 Che sta burla ogni dì toca )  
*Quei bei lavri, quella boca*  
*Do rosete in un bochè;*  
*Me pareva ....* A ste parole  
 La marchesa se destirà,  
 L' avre i occhi, la sospira ,  
 E la dise: *Ah, no schizzar;*  
*No me dol po miga tanto,*  
*La ferida xe leziera ;*  
*Poverazza! P'è sinciera,*  
*Lassa, Beta, lassa andar,*  
 Se la lode piast ai savi ,  
 Figurève po a le done !  
 Le voleu cortesi e bone ?  
 Carezzete , adulazion .  
 Tra l' incenso e la manteca  
 No ghe ponze più la barba :  
 Mo la fragola xe garba ....  
 Fora zutaro panon .

---

## EL CINGANÒ

**L'** altro di in mascara  
Son in Piazzeta,  
E vedo un bozzolo  
A la Lozeta.  
**Sora** tre tavole  
Sui cavaleti  
Montava un Cingano  
In manegheti;  
**L'**aveva a latere  
El so simioto,  
Tre o quatro scatole  
Col so ceroto,  
**E** unguenti e balsami  
Per la matrice,  
E do mandragole  
Con tre fenice.  
**Mi**, che i spropositi  
Pago a contanti,  
Secondo el solito,  
Me fico avanti.  
**Dopo** el preambolo  
Za conseto,

Vede ch' el furega  
 In t'un sacheto,  
 El cava un rodolo  
 De bozzetine,  
 Che 'l basa in estasi  
 Come divine;  
 Po el dise al publico  
 Proprio cussi;  
 No meto virgola  
 Che sia de mi.

*Vengano, veggano,*  
*Nobil signori,*  
*Gravi filosofi,*  
*Dotti dottori;*  
*Voi metallurgici*  
*Drappelli invitti,*  
*Voi della idraulica*  
*Padri coscritti;*

*Veggano, ammirino*  
*Con riverenza*  
*Il capo d'opera*  
*Della sapienza;*  
*Corrano, spieghino*  
*L' arcano eccelso,*  
*Ignoto a Ipocrate,*  
*E a Paracelso;*  
*Quest' è una polvere*  
*Bis-magistrale,*

*Rimedio mistico*  
*Per ogni male;*  
*Ella dà a' stupidi*  
*Senno e valore,*  
*Ai più colpevoli*  
*Fama di onore,*  
*A le fredde Ecube*  
*Caldi galanti,*  
*A' flosci Nestori*  
*Tenere amanti,*  
*Ai pazzi il premio*  
*De la saviezza,*  
*A le Tisifoni*  
*Dà la bellezza;*  
*Per questa polvere,*  
*Chi usar ne sa,*  
*A' fregi, titoli,*  
*E sanità;*  
*Da Roma al Messico,*  
*Dal Cairo al Dolo,*  
*Pregato a lagrime,*  
*La vendo io solo;*  
*Pur, viva l'Adria!*  
*Qui ne fo scialo,*  
*E per un talero*  
*Ve la regalo.*  
*Fenla la predica*  
*Tuti va via,*

Perchè de taleri  
 Gh'è carestia ;  
 A mi mo el recipe  
 De le bozzete  
 Me pol: ghe colego  
 Diese lirete .  
 Curioso esamino  
 La mia spesona ;  
 E quei del bozzolo  
 Za me sbufona .  
 Svodo la polvere ....  
 Tantin zaleta ....  
 Pazienza .... trfpolo ....  
 O pur faveta ....  
 Ma in quel, mo, in gondola  
 Da la Zueca  
 Vien Belicopulo  
 Mestro de Zeca ;  
 E mi va, e mostreghe  
 Quel spolverin ....  
 La gera polvere  
 D' oro , ma fin !  
 Me l' à quel zingano  
 Ficada in man .  
 Oh che satirico  
 De zarlatan !

## I DO LIONI

**S**u l'arene deserte de l'Africa ;  
Dove el Sol de la tera fa cenere ,  
Verso un' arida croda de porfido ,  
Tormentai da una sè che li sofega ,  
A vin' ore , nel cuor de l'istà ,  
S' à do enormi Lioni incontrà .  
Là dal di ch'è andà in aria Cartagine  
No gh'è gnanca più l'ombra d'un albero ,  
Là no piove , russeli no mormora ,  
E do sole o tre volte in un secolo ;  
Fra quei sassi per puro morbin ,  
Qualche Naiade à fato pissin .  
**Ma** quel dì , con un tremito insolito  
De la croda sconvolte le vissere ,  
De poc' aqua s' à avertò un deposito  
E scampano la tenta de scondersè .  
Quei Lioni che acorti se n' è ,  
Sbalza , svola , a stuar se la sè .  
**I** poteva , se i aveva giudizio ,  
Rinfrescarsè in fraterna l' esofago ,  
Ma superbia invidiosa li rosega ,  
E i se yarda , e i se brontola burberi

Con un rantego unisono a do:

*Mi voi beber .... mi solo, e ti no:*

Za le schizze ghe sbufa, ghe zufola,  
 Va le coe stafilandoghe i nombolì,  
 Le massele i spalanca sanguivore,  
 E le sgrinfe i desguanta sbregghifere;  
 I se cufola, i sguinza, i dà su ....  
 Se sperè separarli, andè vu.

I se aventa, i stramazza, i se zapega,  
 I se sgrafa, i se struca, i se mastega,  
 Denti a denti s'incrosa, se stritola,  
 Fioca i peli, la bava ghe sgiozzola;  
 D'urli rauchi e stonae da violon  
 I concerta un duèto a Pluton.

Quei rugiti de rabia in baritono  
 Va su in aria, in le grotte se furega;  
 E le fiere, i volatili, i retili,  
 Spaventai da quel'orrida musica;  
 No se sogna fermarse a vardar,  
 E la serpe se torna a intanar..

Nova stizza li ponze, li stuzzega,  
 Più feroci i Leoni se lacera;  
 A durà quella zufa teribile  
 Più de quella de Achile con Ettore,  
 Perchè Venere, Marte e Netun  
 No ga tolto el partio de nişsun.

Tanti sforzi ogni forza ghe anichila,  
 Ghe scomenza le gambe a far giacomo;



I se ferma; dal grugno ai garetoli  
Sangue vivo ghe spruzza , ghe spizzola ;  
Resta in tera , tra bava e suor ;  
Denti e sgrinfe , trofei del furor.  
Trabalando, sbrissando i se rampega  
Da quel'aqua a cercar refrigerio :  
Ma che ! mentre a la burla dei posteri  
Stava i mati strazzandose i *didimi*,  
S' à quel'aqua a so logo incassà ....  
El Sol ghe arde el respiro .... i mor là .

## L'AVA E 'L PAVEGIO

**Z**a l'Aurora per i campi  
Dà la cazza al lusariol;  
Za da l'onde tra i so lampi,  
Scampa e ride el novo Sol.

Dise a l'Ave la regina:  
*Pute care, adio, bon prò!*  
*Che fragranza a la colina!*  
*A revederse a filò.*

Va la fola industriosa  
Sora i gigli; su i gimè,  
E chi al timo e chi a la rosa;  
Come andemo nu al Cafè:

Ma nu spesso, povereti,  
Rei veleni a sorsegiar;  
Senza spesa nè sospeti;  
Ele 'l netare a chiuchiar:

Stava giusto un'Ava un zorno  
Sù 'n garofolo in zardin;  
Zupegandoghe d'intorno  
A sorseti 'l coresin;

Su quatr'ale tricolori  
Un pavegio *bel esprè*

Passa in quel che à mile fiori  
 Dà del naso tuto 'l dì.  
**El** la vede far bancheto  
 Sul garofolo co 'l va;  
 E co 'l torna dal boschetto  
 El la trova ancora là.  
*Ma bisogna (el dise), cara,  
 Che siè propio de bon euor ...  
 Che costanza! l'è ben rara!  
 Chiuchiar sempre, sempre un fior!*  
**Parè un' ostrega incrostada**  
*Su la croda in mezo al mar,  
 Che no sa trovar la strada  
 De poderse destacar. —*  
 — *Bel emblema dei galanti*  
*(La risponde) avè rason;  
 L'Ava e l'Ostrega costanti  
 Xe un perfeto paragon;  
 'Questa e quella serve atente  
 Al so nobile destin,  
 E chi è nato a no far gnente  
 Nasa fiori per morbin!*  
**Ste** delizie podè averle  
 Vu che ozioso ve fa 'l Ciel,  
 Ma da l'ostrega el vol perle;  
 Da la cera el vol el miel.

---

## KAKALOR E KINKÀ

**E**l Prencipe Kinkà, l' ereditario,  
No so se del Giapon o de la China,  
Spassizava in un parco solitario  
Col so Mentore al fianco in bagolina,  
E la noja, che ai Grandi el tafanario  
Xe solita incandir a la perlina,  
Secava, come la faria coi picoli,  
A so altezza imperial ambo i testicoli.

Ministro in parte de ste operazion  
Gera el Mentore stesso Kakalor;  
El qual con serie indefesse lezion  
Ghe insegnava el mestier de Imperator;  
Che, com'è noto, à da esser giusto e bon  
E magnanimo e intrepido se ocor;  
Che co i monarchi à tute ste virtù  
No serve un bezzo che le abiamo nu.

Mentre Kinkà con aulica decenza  
Va sbadagiando, un rossignol a volo  
Se fica là tra i carpani, e scomenza  
A gorghegiarse un delizioso a solo.  
In estasi ... ma, avezzo a la violenza,  
Kinkà ciga: *chiapèlo*. El rossignolo

A la minacia de la prigionia  
Salta a caval d' un zefireto , e via :

In colera so Altezza . *A ti, vien qua,*  
( El dise a' Kakalor ) *via, sior maestro;*  
*Spiegame mo sta singolarità !*  
*L'oseleto el più amabile, el più destro,*  
*Compositor de sol-do-re-mi-fa,*  
*'Scampa, se sconde in bosco: elo un bel estro ?*  
*E po vien mìle celegati a gropi*  
*Fin su la regia a rovinarme i copi ?*  
— Signor, risponde a l' imperial Infante ,  
Severo Kakalor , *dovè imparar,*  
*Che mentre se va el scioco e l'ignorante*  
*Al so simile franchi a presentar,*  
*L'omo grandò se sconde ; ma el regnante*  
*Che felici i so' popoli vol far,*  
*Nol minacia, lo cerca, lo carezza ...*  
*Se torna el rossignol, creanza, Altezza.*

## EL LION E 'L MOSSATO

**S**passizava gravemente  
Un Lion de casa vechia.  
Un Mossato ghe va arente;  
E ghe dise in t'una rechia:  
*Che siroco sfondradon!*  
*Uh! che caldo, xa Paron!*  
Con un cefo da Megera  
Ghe risponde so Celenza:  
*Eseremento de la tera,*  
*Chi t'è dà sta confidenza?*  
*Vil inseto! ... Chi è di là? ...*  
*Cazzè via costù de qua.*  
St'improperi, oh Dio! al Mossato  
Fa vegnir mo su la stizza.  
El ghe dise: *Xestu mato?*  
*A mi ingiurie! Dime, schizza? ...*  
*Se me meto ... sapi ben*  
*Ch'ogni bissa à el so velen;*  
Gastu boria, di, per quella  
*Celeghera sgrondenada?*  
*Ti me mostri la mascela,*  
*Po le sgrinfe? ... l'è falada;*

*Da volatile d' onor*

*Te go giusto .... ma de cuor :*

*Varda el toro .... xelo grandò?*

*I so corni no ghe giova*

*Se lo vago tormentando,*

*El me cerca e nol me trova.*

*Fa el to conto .... come?... no!*

*Ben .... mio dano! ... proverò.*

**Dito questo , beca e via ;**

**E po torna , beca e svola ;**

**El ghe fa una becaria**

**Dal bonigolo a la gola ;**

**Per le rechie el ghe va su ;**

**Beca e sbigna , nol gh' è più.**

**El ghe sbalza dai zenochi**

**Al barbuzzo , a le zenzive ;**

**El ghe ponze el naso , i occhi**

**E le parti le pià vive ;**

**Fin per farlo desperar**

**Ghe va el sinter a becar :**

**El Lion , che ga presenti**

**Tanti eroi de casa soa ;**

**Che formai crede i viventi**

**Per tegnirghe su la coa ;**

**No se volta , marchia a pian ,**

**Sta con aria da Sultan ;**

**Ma sentindo che i beconi ,**

**A la barba dei antenati ,**

Lo crièla : *mo, cogioni,*  
 Tra lu el dise , *questi è fati ;*  
 El scomenza a pian pianin  
 A far scurzi da arlechin.

Per finir po quella scena  
 Manda al diavolo el sussiego ;  
 Co la coa sferza la schena ,  
 Co le sgrinfe se fa un sbrego ;  
 Fica i denti dove el pol ,  
 E so dano se ghe dol ;

Nè podendo mai cucarlo ,  
 Se ghe svegia un tal rabiezzo  
 Ch'el fa cosse da ligarlo.  
 El Mossato ride un pezzo ,  
 E po el canta in do-re-mi:  
*Te l'oi dito, schizza? a ti...*

Fato el trilo, beca e via ;  
 Ma scorendo la campagna  
 El da drento a una scarpia  
 E un ragneto se lo magna !  
 Cussì avemo do lezion  
 Dal Mossato e dal Lion .



---

## LA FENICE

**C**hi dise per voglia ;  
Cussi, de viazar ;  
Chi dise per boria  
Per farse amirar .

**La bela Fenice**  
L'Arabia felice  
Scorendo in tre dì ,  
De bel mezodì ,  
S' à un zorno trovà ...  
Sau dove-mo? ... a Stra :

**Baucando per aria ,**  
Soleta , a pian pian ,  
L' andava su a Padea :  
Savè che a sta man ,  
Pisani-Moreta  
Ga un bosco. Stracheta ;  
La dise: *Sior sì,*  
*Fermiamoci qui !*  
E un carpano ochià  
La se gh' à sentà .

**La Fama , petègola**  
 Per genio e mestier ,  
 L' à fato ai volatili  
 In bota saver .  
 Cigando in francese  
 La score 'l paese :  
*Oiseaux mes amis ,*  
*La reine est ici !*  
 La lengua i la sa ;  
 S' à tuti afolà .

**El ramo d'un albero**  
 Se fita un zechin ; (  
 L'impresa de l' arzero  
 L' à tolta Manfrin ;  
 I oseli se schiera  
 A miera e miera  
 Co i coli , cussi !  
 Che i par tanti I ,  
 Col beco ispirà ,  
 Co l' ochio incantà .

**Vardandola , atonito**  
 Diseva 'l Paon :  
*Va al diavolo , invidia ,*  
*Cedèmo , Giunon !*  
*Qœi ochi ? xe stele !*  
*Le pene ? candele !*  
*Che Sol ? no , per di ...*  
*Quel beco fa 'l di !*

*Quel zuffo dorà  
 L' à Giove spua' !  
 — Fenice, de l' Iride  
 Sorela magior,  
 Di, quel che te sfamega  
 Xe 'l fogo, o color?  
 Aplaude, fa eco  
 Co tanto de beco,  
 Col faleloll,  
 Col ciricicci,  
 Oseli de qua,  
 Oseli de là ;*

**Ma** quando po in musica  
 Soave, gentil,  
 La modula un : *Grazie !*  
 La par un avril !  
 El Rossignol stesso  
*Ah ! (dise) 'l confesso,*  
*Son vinto ! Sentì*  
*Che trilo in bemi !*  
*Che bel elafà !*  
*Son proprio copà !*

**—** *Belezza adorabile,*  
*Celeste virtù,*  
*Va là che ti meriti*  
*De no morir più !*  
 I osei ciga in fola,  
 Co tanto de gola :

*Che morte? menti ...*

*La torna pipì*

*Sul rogo impizzà ;*

*Le celeghe 'l sa!*

**Ma** in mezo a sto aplauso

*Che xe general ,*

*Sospira la tortora ,*

*Ingenua , leal .*

**Se** acorze, e smanioso

*Ghe dise 'l so sposo :*

*Ti susti, Bibì ?*

*La invidiistu, di ?*

*Perchè stastu là -*

*Col beco cascà ?*

**Responde** al rimprovero

*La tortora: Oibò !*

*Pensava, che .... (Viscere ...*

*Invidia ? mi no !)*

*Che de la so razza*

*L' è sola, gramazza !*

*Che almanco po mi*

*Son sempre con ti ! ...*

*No minga per ... Ma ...*

*No fala pecà ?*

**Quel** merito in isola

*Che spesso invidiè ,*

*Ve. cava le lagreme*

*Se lo esaminè .*

Tra i beni gh'è quel  
Ch'è meglio, fradeli;  
Averli a *demi*.  
No so se capi  
El gusto che ga  
Chi gode a metà!

## EL RE DE COPE

**M**amali quarto, illustre Re de Cope,  
Spassizava in campagna incognitò:  
E gratandose in testa: *Oh le xe trope,*  
*Trope strussie*, el diseva; *oibò, oibò!*  
*I ga 'un bel dir! eh lo sa ben ch' il prova;*  
*L'è propio una galia da pope a prova!*  
*No credo che ghe sia sora la tera*  
*Un omo contrarià come son mi,*  
*Mi vbi la pase, e i me fa far la guera;*  
*No voria meter nove imposte .... oh sì!*  
*Le nave in tochi, l'arsenal in pezzi,*  
*I soldai senza scarpe, e ghe vol bezzi.*  
*Podessio almanco veder schieta e neta*  
*La verità; saver come la xe*  
*Per regolarme! oh giusto! maledeta*  
*Quela che so! Busie quante volè.*  
*E co i sa fato radopiar la paga,*  
*Son un Tito, un Trajan! e che la vaga;*  
*El popolo cussì magna i sculierì,*  
*E a mi la compassion me strazza el cuor;*

*Chiamo ogni dì a capitolo i pensieri,  
Studio la note come un traditor,  
E col mio scetro in man, per quanto fazzo,  
Resto a dretura un vis ... resto un pagiazzo.*

**Mentre el pianze la propria e la sventura**  
Del bel regno de Cope, Mamalù  
Buta l'ochio sui campi, e la pianura  
El vede sparsa de cinquanta al più,  
Tra bechi magri e piègore scachie;  
Sporche, pelae, che no pol star in pie.

**Core qua e là el pastor, ora drio el beco**  
Che drento al bosco se voria ficar,  
Ora a tor su un agnelo seco, seco,  
Che xe cascà che no se pol più alzar,  
Mentre, sie passi in drio, drento d'un fosso  
Sta el lovo devorandoghe el più grosso.

**Buta via quello per socorer questo,**  
E sbrissa e casca e perde questo e quello:  
Un altro lovo ghe spaventa el resto  
E ghe magna el monton coi corni e'l pelo;  
El pastor no ga più gambe, nè fià,  
El se strazza i cavei, l'è desperà.

**Mamalù dise allora: L'è curiosa!**  
*L'è proprio el mio ritratto tal e qual.  
Ai Re donca e ai pastori co una dosa  
Se fa i piati da cogo? no gh'è mal!  
Ma me par che lassù se doveria  
Qualche riguardo mo a la monarchia.*

Caminando più avanti el trova l' erba

Più fresca e bela, più fiorito el pian;  
In riva al fiume el vede una superba  
Lista de grasse piegore in lontan,  
Bianche cussi, che par mentre le beve  
Coverto tuto l' arzere de neve.

I bechi se strassina el pelo in tera,

I castrai pesa cento lire l' un,  
Montoni, agnei ..., se vedessi che ciera!  
I consola a vardarli; un bianco, un brun,  
Ma tuti grassi, in ton; i core, i salta,  
I se monta, i se ingropa, i se rebalta.

Le piegore no pol portar le tete;

Quasi tute ga soto el so bechè;  
L' erba fresca odorosa ghe rimete  
El late, e chiuchia pur che za ghe n' è;  
Per farla breve e terminar l' elogio,  
Credèla, o no, le xe vestie d' orsogio!

El Pastor che le varda xe Tognoto,

Che butà là, a l' ombra d' un salgher  
Se sona un ritornèlo col subioto,  
E po canta, stonando dal piaser:  
*La mia morosa xe tra le più bele*  
*La ga do ochi che le par do stele.*

El Re dise, strenzendose in le spale:

*Vedo, come sta scena à da finir!*  
*Gh' è più lovi che alberi in sta vale;*  
*Schiao siora mandra! ah me voi divertir!*



*A salvar quei boconi, bona note!*

*Ghe vol altro, compare, che vilote!*

**E**, per diana, che zonto in quel momento,

Quasi per far la corte a so maestà,

Passa el lovo, ma lesto come el vento

Dà su Melampo, e lo stravaca là:

Veramente al rumor de la barufa

Un monton se la sbigna per la fufa.

**Ma**, cossa serve? el zerman de Melampo

Ghe xe adosso, a so logo el fa tornar,

E tuto torna in regola in t' un lampo.

Tognoto subia, e seguita a cahtar,

Come se propio nol ghe dasse un figo

De tuto quel che va nassendo: *Amigo*,

**Ghe** dise Mamalù, *feme un servizio ....*

*Saveu che gh'è stà el lovo, e nol saveu?*

*A dirvela, me par poco giudizio*

*Star là cussì; perchè no ve moveu?*

Da la boca levandose el subioto

Responde in bota a Mamalù, Tognoto:

*Sior, no me movo co so bona grazia,*

*Perchè i cani che go li ò scielti mi,*

*I è forti, atenti, e poco pan li sazia.*

— *Ah!* dise el Re dé Cope, *mo siorsi,*

*O' inteso tuto; fixirò i mi afani.*

L'è corso a casa a baratar i cani.

**S'** à visto in bota a moderar le spese,

El fante à storto el muso, el cavalo? *uh*

Ma tuti à respirà da l'asso al diese .  
Se i altri re imitasse Mamalù ,  
I re , za se capimo , amici cari ,  
De spade , de bastoni , de d'ànari ;  
Nò , un palo solo , no la quarta parte ,  
Respirerave el mazzo de le carte .

## I CASTELI IN ARIA

**T**uti sa che là in campagna  
Verso l'alba, senza falo  
Canta el galo: cucuru.  
Dona Cate da la late  
Giusto allora leva su:  
Con un passo la xe in stala;  
Là la monze la Lucieta  
La vacheta che savè;  
La prepara po la zara  
Col so late come el xe.  
L'altro zorno, andando a ponto  
Co la zara su la testa  
Scalza e lesta a la cità;  
A bel bele un bel castelo  
La s' à in aria fabricà.  
*Oh! tre lire (la diseva)*  
*De sto late ti ti trovi!*  
*Tanti vovi ti à da tor;*  
*Ti à da darli per coarli*  
*A la chioca del fator.*  
**Mo** no passa minga un mese  
Che te becola el formento

Più de cento bei pìpi,  
 Che galine grasse e fine  
 Te diventa in quatro dì.  
 Che? la volpe? sì, marmèo!  
 A vardarle no ti spendi,  
 Ti le vendi, ma co ben!  
 Tiò un porcheto; povereto!  
 Ve' co belo ch' el te vien!  
 L'è st'altr' ano da casoto;  
 Oh, che lardo! el fa la goba,  
 I tel roba da le man;  
 Vòi cinquanta; vòi setanta,  
 L'è 'l so prezzo come un pan.  
 Ti pol torte co sti bezzì  
 Una vaca .... ih, che panza!  
 Oe .... t'avanza un vedelon;  
 Varda, el salta, el se rebalta  
 Tra le piegore e 'l molton.  
 A sto passo d'alegrezza  
 La fa un salto su la giara,  
 E la zara, tunfe .... zo;  
 E schiao late, bondi Cate,  
 Vovi, porco, vaca e hò.  
 Done care, tegnì streto,  
 Cari amici, tegnì duro  
 Quel sicuro che gavè.  
 Mo i xe beli! ... ma casteli  
 Tuti in aria: lo vedè.

## EL MULO IN GLORIA

Qualche volta, le disgrazie  
Xe mo bone da qual cossa;  
I canali le desgossa  
Dove score la rason;  
Le sculazza l'avarizia,  
La libidine le scota;  
E'amor proprio le sberlota;  
Le desmaschera un'bufon!  
Là in Romagna un Mulo in grassa  
Brigliadoro d'un prelato,  
Se vantava d'esser nato  
Nel *Haras* del gran Signor;  
Ma per altro po 'l saveva  
Che so mare la cavala  
Avea avudo for de stala;  
Qualche fufigna d'amor;  
Ma lu vol scordarse afato  
Quel anedoto insolente;  
De la mama no l' à in mente,  
Che le *belliche* virtù.

Quali, in fati, e quante imprese  
 Fate in Asia e qua in Europa;  
 Mentre ch' ela aveva in gropa  
 Scanderbek, o Tamerlan.

De sta gloria cavalina  
 Sgionfo l'anema superba;  
 Sdegna el Mulo el fen e l'erba;  
 El vol biava e marzapan!

El sta serio su le soe  
 Co i cavali da carrozze;  
 Quei de posta ghe par rozze;  
 Quel del Papa .... oh quello sì!

*S' io dovessi (el se diseva)*  
*Portar qualche soldatello,*  
*Un frataccio, un barigello;*  
*Di rossore morrei lì!*

Una sera, solevando  
 Baldanzoso al ciel la testa;  
 Con do ochiazzi lustrì in resta;  
 Che le stele vol sfidar:

*Va nascondi la tua chioma,*  
*Forsennata Berenice,*  
*Di mia madre, mira, dice,*  
*L' aurea coda scintillar!*

Sì dicendo, un per de zampe  
 Se ghe ingambera, e a l'ingrosso  
 Co la zara in mezo a un fosso  
 Patatunfete, piombò!

Se ghe spaca la clavicola,  
Ghe va un tronco in tel da oto,  
I lo tira suso zoto:  
*Quasi 'l collo si staccò:*  
Monsignor lo trova strupio,  
Reso inabile al servizio:  
*Va, ti macina il giudizio!*  
E al molin el l' à mandà.  
Tra 'l baston e la cavezza,  
Zopegando, a colo storto,  
D' Enza madre el pero morto  
El s' à in bota recordà!

---

## BARBA SIMON E LA MORTE

**S**cartabelando i so registri, un zórno  
La Morte à trovà un rosto! A conti fati,  
Secondo el so capriccio, un certo vechio,  
Deto Barba Simon,  
Doveva da vint'ani  
Far tera da bocali; e con bravura  
Se scrocava la vita: *A mi* (la dise)  
*Te vegno a consolar, le mie raise!*  
E la tol suso la so brava falce,  
La ghe dà'l filo in pressa, e la sgambeta  
Per cucarselo in casa a cavalier;  
La branca con dispèto el bataor,  
E la dà una batùda da creditor.

Barba Simon gera andà giusto in caneva  
A spinarse una bote. A quel fracasso  
El lassa tuto, el core, el sbalza su,  
El spalanca la porta: *Vita mia,*  
*Un'altra volta* (el dise) *batè a pian;*  
*Che za go bona rechia.*  
*Oh, via, chi seu, cossa ve casca, vechia? --*



— *Varda sto siega vite!*

*Goi bisogno de dir che son la Morte?  
Vegno a cercar quela forza de vechio  
Che alogia qua de su .... dov' è la scala?  
Sbrighemose, alon, presto,  
Che dizisete medici me aspeta  
A l'arcòva d' un Re .*

— *Go qua 'l fagoto,*

*Canare, e mi son pronto .*

— *Eh, no la go con ti! voggio, te digo,  
Monsù Barba Simon, voi quel spuzzeta,  
Che da un secolo forsi a le mie spale  
Fa carnaval del lacrymarum vale .*

— *O' inteso ben, capisso: qua se trata  
De far un pisoloto co la coa  
A brazza colo de l' eternità;  
E mi ve l'ò za dito, e mi son qua;  
Perchè, a scanso d' equivoci, sapiè,  
Che quel Barba Simon che v' à mo fato  
Saltar la mosca su la schizza, quello  
Son propio mi! ,*

— *Me tiostu per un astese?*

*Ti? quel color, quei denti, quei caveli,  
Quela gamba, quel ose, quela vita,  
Te' l' à imprestai la bela Malgherita?*

— *Ma la xe mo cussì!*

*Barba Simon son mi!*

— *Adasio: parla schieto,*

*Te la intendistu forsi, bel vechieto,  
Con quel famoso magnetizator  
Che resussita i morti? ...*

— *So benissimo*

*De chi volè parlar!  
O sentio celebrar i sò prodigi,  
So la zuca ch' el xe;  
Ma mi con lu n' ò mai parlà a la sè!  
— Donca ti ga un specifico,  
Un elisir, un balsamo,  
Qualche diavolo, in soma, te fa forte  
E te tien vivo a spese de la Morte.*

*Orsù, vien qua: vegnimo a pati; vivi  
Fin che ti pol (che xa una volta, o l'altra  
Te cucarò anca ti), ma in ricompensa  
Ti m' à da palesar el to secreto:  
Nè aver pàura xa, che mi ... minchioni!  
Saria l'istesso che serar botega  
E voler dar el cul su la bancheta.  
Fora quella riceta.*

— *Oh! l'è facile, e curta in verità!*

— *Ben, dila su.*

— *Son qua:*

*Bisogna che sapiè, comare cara,  
Che fina da quel dì che la rason  
M' à deslatà el giudizio,  
Nè a vu, nè al zorno che volessi farme  
L'onor de visitarne,*

Con vostra bona grazia, n'ò volèstò  
 Mai pensarghe un momento.  
 Timor de l'avegnir? mi no lo sento!  
 O studià sempre, da putelo in su  
 De tor el mal, el ben  
 Tal e qual, com' el vien;  
 Goder, sofrir senza trasporti e smanie,  
 E per una secreta antipatia  
 Col sentimento, che xe 'l re dei guai,  
 Mi no so d'aver mai  
 Proprio abusà de gnente in vita mia.  
 Cussì, graziadio, san, neto in utroque,  
 De vissere, voi dir, e de conscienza,  
 Vivo (che xe dei ani veramente!)  
 E vivo ben. N'ò domandà mai gnente,  
 Nè rifiutà mai gnente a la natura.  
 Oe, mi v'ò dito el medico e la cura;  
 Se sta riceta ga qualche virtù,  
 Vardème un'altra volta, e disè vù!

## EL SOL O I DO PAPÀ

**S**tando in sofita, vinti zorni fa ,  
Le mie fiabe morali a spulezar ;  
Sento zente de fora : la verità  
Che qualchedun me vien (digo) a secar !  
Possio mo star mai solo ? *Chi è de là ?*  
— *To barba Nicolò : se pol éntar ?*  
— *Ghe semo ! avanti pur. (Qualche pazzia !)*  
— *Un momento, nevodo, e andemo via.*  
— *Ma sti signori qua con vu mo ? ... — Questi*  
*Xe do illustri Papà de razza grega .*  
— Scusi , signore , se le sian molesti ...  
— *Le se acomodi qua , st'altra carega .*  
*Toni, el casè (ma de carboni pesti !)*  
— *Sto pezzo qua , xe 'l celebre Ipomèga*  
*Filosofon perspicace cussì*  
*Ch'el vede el Sol quatr' ore avanti di :*  
*Ma dopo aver passà tempi e vicende ,*  
*Fenomeni e natura ; persuaso*  
*De no badar a quel che no se intende ,*  
*L'è diventà l'apostolo del caso ,*

*Dal qual, secondo lu, tuto dipende...*

— *Ma Nicolò il Nipote ... — Daghe un baso:*

*Perchè el sistema ch' anca lu s' à fato*

*Più sublime del too, xe mo più mato.*

*E st' altro xe Mislogo so fradelo,*

*Altra medaglia de diverso conio;*

*Lu, per paura de sbusar el cielo,*

*S' à tegnù sempre basso el comprendonio;*

*Nol varda vovì per no veder pelo,*

*E 'l crede la rason fin del demonio.*

*Ste cargadure xe per altro po*

*Dò amici de to barba Nicolò.*

*Impazientà de vederme davanti*

*Sti tre tomì da dar ai ligadori:*

*Me ne consolo (dìgo); e cussì, avanti:*

*In che poss' io servir mo sti signori? ...*

— *Una fiabeta sola; i à sentio tanti*

*Parlar de sti to apologhi. — Schiao sìori*

*No i me lassa de pesto. — Uno, una solo,*

*Quel che ti vol, e andemo via de volo.*

-- *Oso pregarla anch'io. -- No gh' è bisogno*

*Le serviria .... Ghe n' è qua giusto uno*

*Che squasi, squasi, ma no me la sogno ....*

*Siben per altro ch' el saria oportuno ....*

*L'è mo ancora putelo, e me vergogno. —*

— *È giovanetto? Non amò nessuno*

*Mai più di me la fresca gioventù!*

— *Oh! L'è un Socrate, sastu: via, di su;*

- M'ò lassà sfregolar un altro pezzo**  
**Dal doto e da l'aloco ;**  
**Po risponde Ipomega ,**  
**Sentà su la carega**  
**Giusto in fazza de mi . - *Ben co le vol ...***  
**( Digo ) *le servo ... za l'è breve ...***
- ,, Gore i Numi el destin d'un bel nastro ;**  
**L'è a la moda , o nissun più lo vol ;**  
**Cussi 'l Sol , co à mancà Zoroastro ,**  
**Xe andà in fumo anca 'l culto del Sol .**
- ,, Pur là in Persia , fedeli a la seta**  
**De quel celebre magico Re ;**  
**Adorava 'l diurno pianeta**  
**Soli ancora , Abakù e Kabarè ;**
- ,, Ma siben mo che i gera zemeli ,**  
**Da una nena latai tuti do ,**  
**Tanto simili i aveva i cerveli**  
**Quanto el grugno una notola , e un bo .**
- ,, D'Abakù gera in fati la fede**  
**Paralitica sul canatin ;**  
**Se nol vede ma ben , lu no crede ,**  
**E i principj l'esamina e 'l fin .**
- ,, Dal momento ch'el sponta e ch'el s'alza**  
**Fin ch'el Sol va po a scondese in mar ,**  
**Lu gh'è adosso , co i occhi el lo incalza**  
**Se diria ch'el lo vol divorar .**
- ,, D'ogni raggio el confronta le cime ,**  
**De la massa el misura el calor ;**

- E al secreto l'aspira sublime  
 De la causa de tanto splendor;  
 „ Ma, dai, dai, contemplandolo fisso  
 Abakù in quatro zorni s'è orbà,  
 E co i ochi in caorlo ne l'abisso,  
 L'esistenza del Sol l'è negà. ”
- E per fenir el zogo,  
 Che avevo scomenzà,  
 Voltandome a Mislogo  
 Ò cussì seguità:
- „ Kabarè so fradelo, a l'oposto  
 Gera credulo e pio più de mi.  
 Se i me dise: *l'è lessa sto rosto,*  
 Bevo 'l brodo, e po digo: *sior sì.*
- „ Lu pianzendo la sorte funesta  
 Del so doto fradelo Abakù,  
*Eco ('l dise) che chi ga più testa*  
*Del so spìrito abusa anca più.*
- „ Donca mi deventar vogio un scioco,  
 Viver dindio, morir barbagian;  
 Xa chi vol una cossa, ogni poco  
 Se no ancuo, se la beea doman;
- „ E svodai da la zuca là in strada  
 I so quatro graneli de sal  
 El cervel ghe diventa panada,  
 Nè ghe resta ch'el brio d'un stival.
- Ma se po ('l dise allora) al pianeta*  
*Sto vardarlo paressa un'ardir?...*

*Se me sbrissa un'ochiada indiscreta*

*El pol forsi ... lo poi prevegnir.*

,, Soto tera el se scava una grola,  
El se fica più in fondo ch'el pol;  
Nova talpa, spontanea, devota,  
Gnanca lu po no à visto più Sol."

Terminà la mìa favola; no fazzo  
Per lodarme; nissun no m' à lodà;  
Vedo muti i Papà, co i occhi fissi.

Inventariarse i peli de la barba;  
E soto cozzo via rider mio barba;

Ma levandose su da la carega,  
Cussi, dopo 'l caffè, dise Ipomèga;  
— *Se si chiede a Mislogo, ed a me*  
*Dei due Persi il più saggio qual fu,*  
*Egli certo dirà Kabarè;*  
*Io l' intrepido e dotto Abakù.*  
*Buon amico, giacchè siamo tre,*  
*La quistione decidila tu. —*

-- *Mi per mi, compare caro,*  
*(Ghe risponde Nicolò)*  
*A dretura li dichiaro*  
*Do bufoni, tuti dō.*  
*Anzi senza controversia,*  
*Mi li credo, quanto a mi,*  
*L' Ipomèga de la Persia*  
*E 'l Mislogo de quei di.*

A ste parole i do Papà borbota



Quatro maghe sarache in lengua dota ,  
 Che pol far gropo e machia  
 Co la catramonachia,  
 E i divora le scale in t'un momento,  
 Come mosconi portai via dal vento.

— *Schiao sior tomo! che bel mato!*

*A revederse, bondì!*

— *Vu se' l'omo, e mi 'l ritrato,*

*Caro barba, compatè.*

E za lesto el ghe xe drio

Per tornarli a sbufonar:

E mi resto, grazie a Dio,

Le mie fiaba a spulesar.

## TOGNOTO E LA MORTE

**T**ornava dal bosco  
Coi fassi sul colo  
Tognoto, ma solo;  
Ansando; sustando;  
Strussià come un can.  
*Beato, el diseva,*  
*Chi voga in galia;*  
*Che vita bu .... e via!*  
*Me strazzo, me mazzo,*  
*Po .... a capo doman.*  
*Me trema le gambe,*  
*Sta carga me struca;*  
*O' spanto la zuca,*  
*Nè posso che a un fosso*  
*Stuar-me la sè;*  
*Se arivo po a casa*  
*Un leto de pagia,*  
*Sie fioli che sbragia,*  
*La Lucia me crucia,*  
*So mi po perchè!*  
*El prete me aspeta*  
*Ch' el vol el quartese,*

*Me cresse le spese,  
I stenti, i tormenti ...  
No trovo pietà.*

*Oh Morte, delizia  
Dei più desperai,  
Finissi i mi guai ...  
Un baso, e po taso ...  
Via, cara, vien qua.*

**E** in tera rabioso  
Tognoto, a sto passo,  
Precipita el fasso,  
La morte più forte  
Tornando a chiamar.

**La** morté mo in quello,  
A falce guada;  
Traversa la strada;  
Che vite romite  
L'andava a oselar.

**La** sente chiamarse,  
La gh'è za davanti:  
*Son qua senza guanti,*  
La dîse, raise,  
*Me vustu co ti?*

**Tognoto**, che vede  
Quel'orîda schizza,  
No go tanta pizza:  
Raise, el ghe dîse,  
*Me cargo, bon di,*

## EL PUTELO E LA LUNA

**U**na bela damina, e taso el resto  
Perchè no voggio chiacole per piazza,  
Avendo el primo maschio, l'è volesto  
Arlevarselo ela, poverazza!  
So mario, che gaveva poco sesto  
Siben ch'el gera Senator de razza,  
El l'è lassada far; ma quel putelo  
Presto a la mama à rebaltà el cervelo.

Cossa serve .... La gera incocalia.  
Pisselo in leto? *Povereto, el sua:*  
Ròmpelo la spechiera? *Vita mia,*  
*Varda, per carità, no te far bua.*  
Diselo un' insolenza, una busia?  
La ghe dà un baso e po un graspeto d'ua:  
Dalo un pugno sul muso al sior maestro?  
*Che bufoncèlo, che maton, che estro!*

In soma per paura ch'el se amala  
No la vol che nissun ghe contradiga.  
El ragazzo, che sa che mai nol fala,  
El fa tuto a so modo, el se destriga.  
Se no i xe pronti a darghe su la bala.  
El va in furor, el pesta, el rompe, el ciga;

E de set' ani apena , quel frascon  
Gera un Atila in erba belo e bon .

El papà Senator vedeva el putò  
Da l'amor de la mama sassinà ,  
Ma nol gaveva cuor de farse bruto  
In fazza de la so cara metà .  
I parenti diseva senza fruto ,  
I amici no gaveva autorità ,  
Ela po , se anca i tenta iluminarla ;  
Gh'à el don de Dio de no ascoltar chi parla .

Mentre la stava un dì lezendo sola ,  
O ingropando panèle .... uh che rumor !  
Da la corte sbregandose la gola ,  
Quel bardassa cria : *mama* .... con furor :  
La buta tuto al diavolo , la svola ;  
Indovinè mo perchè ? un servitor  
Ghe negava una cossa fora d' uso ;  
E lu da rabia se sgrafava el muso .

*Pezzo d' aseno , forca , di , perchè  
No ghe portistu subito corendo ,  
Quelo ch' el vol ? se in casa no ghe n' è ,  
Birbante , va a comprar ; son mi che spendo ;  
Ubidissilo in bota . Ma el lachè  
Strenze le spale , e risponde ridendo :  
Celenza , el pol cigar fin a doman  
Chè no ghe dago gnente da cristian .*

La torna su furente in convulsion ;  
So mario gera in camera d' udienza ;

La ghe conta l'ardir de quel bricon,  
 La ghe manda de mal la Conferenza,  
 Tuti va a la fenestra; e dal balcon  
 Co un pegio da *Caovechio*, so Celenza  
 Dise al lachè: *Ubidissi temerario*,  
*O te cazzèrò via senza salario.*

-- *Ma .... za paron, ste cosse, con permesso,*  
*No le se ghe fa bone gnanca in cuna:*  
*El vardava in quel sechio, e per riflesso*  
*L'à visto in acqua bagolar la Luna;*  
*Sala mo cossa ch'el vorave adesso?*  
*Se la parona ghe ne pol dar una,*  
*Mi no per brio! nol vol miga el ragazzo*  
*L'acqua nel sechio, el vol la Luna, c....!*

Ride tuti, compreso la parona,  
 A sto spropositazzo da paela;  
 Ma la ghe pensa su, la ghe ragiona.  
 El zorno dopo no la par più ela,  
 Coi speroni e la scuria la scozzona  
 El so pùlier; l'à portà brena, e sela...  
 Oe .... l'è stà *Consegier de Santa Crose*,  
 L'è andà su come *Rosso*, e morto *Dose*.

## EL PARALITICO E L'ORBO

**V**iveva a Balsora,  
Cità de Persia,  
Trent' ani fa  
Do miserabili,  
Che proprio merita  
Celebrità.

Un gera strupio  
E paralitico  
Desnombolà,  
E l'altro, un inclito  
Professor d' Otica  
L'aveva orbà.

Quel stava immobile  
Vicin a un gatolo  
Abandonà;  
S' el tenta moverse  
El casca in sincope,  
El fa pietà.

Tuti el comisera,  
Nè ghe fa un' anema  
La carità.  
La fame el rosega,

La rabia el sofega,  
L'è desperà .

L'Orbo a una betola  
Da terza a vespero  
Stava puzà ;  
De drento i crapola ,  
Ma gnanca tossego  
Nissun ghe dà .

S'el va el precipita ;  
La gola el strucola  
S'el resta là ;  
Almanco avesselo  
Quel can da' foleghe  
Che i ga copà !

L'era el so codega  
Da lu in tei bozzoli  
Sempre menà ;  
L'aveva in piccolo  
Provisto al mastego ,  
E sbezzolà .

Sgiozzando lagreme  
Su la so perdita  
Col cuor strazzà ,  
A pie d'un albero  
Col Paralitico  
El s'è trovà .

Conforta i poveri  
L'aver dei miseri



In società.  
 Le so disgrazie  
 Interrompendose  
 I s' à contà.

Dopo che al diavolo  
 I ricchi stitici  
 I à ben mandà;  
 Par che ne l' anema  
 Ghe piova el netare;  
 I chiapa fià.

**Al Paralitico**

Dise con spirito  
 L' Orbo: *Vien qua:*  
*Ai pover omeni*  
*L' ira, la colera*  
*No à mai giovà;*

*Ricchezze e feudi*

*Se a pochi stolidi*  
*A' el ciel donà,*  
*D' inzegno fertile,*  
*D' astuzie prodigo*  
*El cuor dei omeni*  
*No è minga in Persia*  
*Desumanà;*  
*E po le femene*  
*Tien sempre catedra*  
*De umanità;*

*Amigo, credime,*

*Tanto xe un talero  
 Che do mità .  
 D' acordo unimose ,  
 Sposèmo i cancheri ,  
 Le avversità .*

*Gambe per moverme  
 Mi' go ; per vederghè  
 Ochi ti ga .  
 Saremo i organi  
 De indispensabile  
 Necessità .*

*Levate in aria ;  
 Su in spala ; puzete ...  
 Cussì se fa .  
 Varda che pupole !  
 Ste gambe crozzole  
 Per ti sarà ;  
 Ti per mi esamina  
 Con ochio vigile  
 Dove se va ;  
 E l' Orbo intrepido ,  
 Dove te comoda ,  
 Te porterà .*

*Do corpi inabili  
 Un san e vegeto  
 Cussì à formà ;  
 I cerca , i furega  
 Tuti i viotoli*

De la città .  
Da quel spettacolo  
Mossa la publica  
Curiosità,  
Se afola el popolo ,  
E l'elemosine  
À scravazzà.

---

## EL GRILO E LA FARFALA

**S**conto là tra l'erba e i fiori.  
Stava un povero Grileto ,  
Contemplando con dispeto  
Un superbo Galalin .  
**Su** quatro ale fine fine  
De magnifico lavoro ,  
Ghe brilava in mezo a l'oro  
El smeraldo col rubin .  
**Che** bel vederlo a capriccio  
Lasciveto andar svolando ,  
Sal e spirito robando  
A la rosa , al zensamin !  
**Ma** diseva tra lu el Grilo :  
*Che giustizia mo xe questa ?  
Me darave un pugno in testa  
Quando penso al mio destin !*  
**La natura incocalia**  
*De quei corni che l'impira ,  
A lu tuto , e qualche lira ,  
E a mi gnanca un bagatin !*  
**A lu grazie , vèzzi e doni ,**  
*A mi i sali d'una zuca !*

*Via metème la peruca*  
*Che son proprio un figurin .*  
*Gh'è nissun mo che me varda?*  
*No i sa gnanca che ghe sia,*  
*Creparò de sora via*  
*Soto el stalfo d' un fachin .*  
*Mo no gera megio assae ...*  
*Corpo e taca ... de lassarme*  
*Nel mio vovo, che menarme*  
*In sta gala, a sto festin ?*  
*Dà su intanto ch' el taroca ,*  
*Oto , diese puti in fola ;*  
*Che tornava da la scola*  
*Morsegando el Calepin .*  
*Vista apena la Farfala*  
*Veramente bela e rara ,*  
*Tuti core , tuti a gara*  
*Tenta farghene botin ;*  
*E chi spiega el fazzoletto ;*  
*Chi la man stende bel belo ;*  
*Quelo sporze el so capelo ,*  
*Questo buta el baretin .*  
*Fa de tuto per salvarse*  
*Quela povera Farfala ,*  
*La va su , ma po la cala ;*  
*Se la cuca el più vicin .*  
*Tuti allora ghe xe adosso ,*  
*Chi la testa ; chi un'aleta ,*

Chi ghe strazza la coeta:

Bona note Calalin.

Quando el Gello che spiava

Vede come l'ha finio;

*Mo minchioni!* el dise, scio;

*Che el se peta el so morbin!*

*El brilar, a quel che vedo,*

*Costa tropo; adio sior mondo,*

*Torno in buso, me sprofondo,*

*Vado a farne Certosin.*

Fioli cari, avemo tuti

Mal e ben in varia dose,

Ma chi spica sempre rose

Più dei altri dà nel spin.

---

## EL PROGETO DE L'ASENO

**D**iseva un Aseno  
Ben bastonà:  
No gh'è giustizià,  
Nè carità.  
**Perchè** mo a Trotolo,  
Can del fator,  
Tante mignognole,  
Tanto favor?  
**Tuti** lo cocola,  
*Vien qua, tè-tè,*  
Buzzolai, zucchero,  
Cipro e caffè;  
**E** a mi che strussio  
Più d' un stalon,  
Povero diavolo,  
Pagia e baston?  
**Quai** xe i so meriti  
Voria saver?  
Mi no so vederli  
Da cavalier.

**Alzarse e meterghe**

Le zate in man ,  
Saltarghe ai totani,  
Farghe bacan ;

**Star come i omeni**

Col peto in su ,  
Licarghe in gringola  
Dal ron al cu ....

**Ma se ste buscare**

Lo fa regnar ,  
Per cossa m'oi .  
Da desperar ?

**E grazia e spirito**

Anca mi go ...  
Orsù , provemose ...  
Lo imiterò .

**E la so massima**

Fissà cussì ,  
La mete in pratica  
L'istesso di .

**Torna da Vespero ,**

O dal Perdon ;  
Col padre Ipolito  
El so paron !

**Co vede l'Aseno**

Ch' i è là ch' i vien ,  
Se mete a l'ordene,  
Se posta ben ;



**E su drezzandose**  
 Lesto e gentil  
 In perpendicolo  
 Da campanil,  
**Spalanca in ipsilon**  
 Le zampe, e zo;  
 Al colo butase  
 De tuti do.

**Li basa e strucola**  
 De vero cuor,  
 Li imbava e imbrodola  
 Da far oror.

*Misericordia!*  
*Ajuto! oimè!*  
**E a gambe in aria**  
 Va tuti tre.

**Ma Biasio e Tofolo,**  
 Toni e Martin,  
 Chi armà de latole,  
 Chi armà de spin,  
**Come a Venezia**  
 Sul bacalà,  
 Pesta su l'Aseno...  
 I l' à copà.

**Par che sta favola**  
 Ne voglia dir,  
 Che del so circolo  
 No s' à da uscir:

## EL LOVO E LA CIGOGNA

Un Lovo, zentilomo del paese;  
Tornando da le nozze de do Gati,  
Dove, per comparir grato e cortese  
L'aveva divorà piatanze e piati,  
Gaveva ancora un osso ficà in gola,  
E nol poteva proprio liberarse;  
Oe .... ghe andava mancando la parola,  
E za el gera là là per sofegarse.  
Ghe mete el beco drento in pressa alora  
Una Cigogna che la gera in ziro,  
La branca l'osso, la ghel tira fora:  
E'l Lovo: *Oh, oh! no moro più, respiro.*  
La Cigogna se aspeta un regalon;  
Gnanca el la varda. Ela ghe dise a pian:  
*Me donela qualcosa, za-paron?*  
E lù: *Credo, comare, che scherzè,*  
*V'ò lassà tirar fora el cole san,*  
*E volè che ve paga? ingrata, andè.*  
Done, za me intendè,  
Gh'è el Lovo anca fra nù. Felici  
Se in premio de la vostra carità  
Tuto el mal ch'el pol farve nol vel fa.

---

## LA LEZION

**C**he bel cielo ! proprio belo !  
La colina stamatina  
Xe superba ; fina l'erba  
Par più verde ; no se perde  
Gnanca un fior .  
E st' arieta ! benedeta !  
La va al cor .

**Fè un servizio, don Fabrizio,**  
Conduchèlo sto putelo  
Verso 'l monte, per le sconte ;  
Drio 'l boschetto ... l'è un mièto  
E mezo al più .  
Za ghe giova ; po se prova ,  
Caro vu .

**Qua el fa un chiasso... a spasso, a spasso,**  
Che no vogio più sto imbrogio ;  
Podè andando, chiaccolando  
Farghe scola ; la parola  
Dà lezion .  
Stuzzeghèghe , scozzonèghe  
La rason .

**Dov' el sia mo? ... Zise, via**  
*Col maestro .... Che bel estro!*  
*Xestu mato? zo quel gato ...*  
*Che sempiezzi, che strighezzi*  
*Ch' el se tien!*  
*Oe, la mama che te chiama ...*  
*Va là ... el vien.*

**El ragazzo gh' è za in braccio:**  
*La scooleta, presto, Beta ...*  
*Sta su dreto .... tiò 'l pometo,*  
*Supia el naso .... dame un baso;*  
*Zo 'l colar.*  
*Via batocchio;... l'abia ochio;... (a don Fabr.)*  
*E no suar (al putelo).*

**El tol suso, for da un buso**  
*De la stala la so bala.*  
*L' à in scarsela una burela,*  
*Quattro nose, e un bel Dose*  
*In marzapan;*  
**El subioto, un pomo coto,**  
*E piombè in man.*

**Don Fabrizio tol l' ufizio;**  
*I so guanti, e marchia avanti*  
*Motivando, cantuzzando*  
*Tantum ergo. Zise a tergo*  
*In sol - do - rè*  
*Ghe fa fiò - fiofiò - fiò*  
*Col so piombè.*

Scorabiando, matizando

Spesso Zise : — *En diga* (el dise)

*Chente chele, tossa xele*

*Sion maento ! L'è un tormento !*

Se noi sa !

— *Zuche tonde* (el ghe risponde),

*Tasè là .*

I se avanza , e in lontananza

Là de fronte a pie 'del monte

- Sau ch' il vede ! Palamede

Quel da Como : quel bel omo !

No capi ?

Quel che gera l'altra sera

Qua con mi .

Don Fabrizio conosceva

Palamede ; e fa 'l giudizio

Ch' el doveva co 'l lo vede .

Ma 'l putelo ( come spesso

Fa tre quarti del bel sesso )

Mal a pena l' à vardà ,

Che à za visto e giudicà :

*Oh to gando ?* (el dise) quando

A redosso da una ciesa

El ghe vede per da drio

Un altr' omo spontar su ,

Alto tanto più de lu .

Figurève che sorpresa !

El lo varda incocalio :

*Vanda pento, sior mäento  
Ta le piante gh'è un zigante,  
Da dio via vien su Golia.*

*Capla l'otica ignoranza  
Del putelo, per difeto  
De pensar a la distanza  
E a la base de l'ogeto.*

**Eco** (dise don Fabrizio)  
*El momento mo propizio  
De poder co la lezion  
Scozzonarghe la rason.  
Golia, caro? andèmo su  
E vedèmo se l'è lu.*

**El** ghe branca una manina,  
E i va su per la colina.  
Palaméde giusto in quello  
Fava in zo l'istessa strada;  
El lo incontra col putelo,  
Ma 'l putelo no ghe bada,  
Ch'el lo crede tal e qual  
Ch'el l'ha visto poco prima,  
Un bel'omo; lu mo stima  
Più un zigante natural.

**Ma** più suso de là un poco:  
*Vegni qua mo, sior a loco,  
(Dise 'l prete) vita mia,  
Questo xe 'l vostro Golia,  
Questo xe 'l vostro Golia.*

E chi vedelo?

Un ometo, un gobeto

Alto, longo

Mezo braccio più d'un fongo;

Che dal sito dov' el stava,

Visto là da la pianura

De do quarte superava

Palaméde de statura.

El ragazzo resta là,

Contemplandolo incantà:

*Golia chento, sion maento?*

*To gobeto! l'è un ragneto!*

— *Oh l'au visto? imparè, sior,*

*E lighèvela, mo, al cuor;*

*Che bisogna esaminar,*

*Confrontar e separar*

*Per poder ben giudicar.*

*E pol andar a pati a l'Ospeal*

*Chi senza s'advertenza misurando.*

*Confonde co la statua 'l pedestal.*

*L'omo dreto, belo, grando*

*Tanto a basso, che qua su*

*L'aveu visto? el resta lu,*

*Tal e qual l'è Dio formà.*

*Se va 'l gobo rampegando*

*Per da drio sora de lu ...*

*Ben; l'è un gobo che à da su,*

*Che la goba à sublimà.*

*Vienlo zo mo dal so scagno?*

*El gobeto, povereto*

*Resta un ragno. Velo là.*

**Don Fabrizio** con giudizio

La lezion à fenio qua ;

E po a casa col putelo

A bel belo l'è tornà .



---

## EL VISIR E L'ANELO

**A**l Cairo, circa setant'ani fa,  
Kalù bizàro, prodigo Bassà  
D'una de quele coe che val per tre,  
À fato un dì chiamar per el lachè  
El so prete de casa, un bon Dervì,  
Savio, prudente, e 'l ga dito cussi:  
*Belchù, varda sta gema: te dirò  
Per chi l'à da servir. Za de ti go  
Prove che basta: tiola donca su,  
La deposito in man de la virtù.*  
Queste xe borse piene de oro. Va,  
Zira l'Asia, l'Europa, le cità,  
Le vile, i borghi, le moschee, i caffè,  
E pesa le pazzie quante le xe;  
E co ti trovi (giudica pur ti)  
El mato più solene de sti dì,  
Faghe a l'uso oriental un prostind,  
Metighe in deo l'anelo, e dighe: tiò,  
Questo è 'l tributo del Bassà Kalù;  
E in quatr' ani te aspetto. Adio, Belchù.

Belchù tol su l'anelo e 'l so casnà ;  
 El se mete a viazar, e presto el sa  
 Che compresi i filosofi coi rei  
 Dei mati al mondo, graziadlo , ghe n'è ;  
 Cervei bislachi senza ti nè mi ,  
 Logiche gravie de chichirichì ,  
 Teste che suma *tre fia cìnque do* ,  
 Spiriti incoronai de *qui pro quo* ;  
 E gh'è per tuto inzegni a cul in su  
 Che crede el *noi* sinonimo del *tu* .

Tra i vovi a corbe de l'umanità  
 A scieglier mo te vói ! come se fà ?  
 Se mentre sora d' un la man portè ,  
 Un più belo e più grosso ghe ne ochiè .  
 Belchù studia , confronta , invoca All ,  
 Ma cossa serve se nol sa po a chi  
 Consegnar quel anelo : a San Malò  
 L'aveva trovà un tomo ... e squasi ... Oibò  
 ( Ghe dise el cuor ) a Roma , o in Calicù  
 Ghe n'è forsi un più belo de costù .

Sempre in dubio el Dervì , mortificà ,  
 Tuta l'Asia e l'Europa l' à zirà ;  
 L'è tornà a Douvres , l'è tornà a Calé ...  
 L'anelo ... sempre el lo ga in man . Ma chè ?  
 Tra una fola d'eroi , de *beaux-esprits* ,  
 Come a un solo mo dir : *Tiens, mon ami* ?  
 Per no incandirse l' anema e i cocò ,  
 Oh basta , el dise , che ghe pensa el Bo ;

Tornerò a casa , cercarò tra nu :  
 L'è a Venezia , el s' imbarca per Corfù :  
 Mati a Venezia nol ghe n' à trovà ,  
 Ma dei *Savj* a fioroni in quantità ,  
 Co l' è a Costantinopoli ( vardè  
 Quando che i dise ) mentre el beve un tè  
 Corer el vede el popolo , i spahi ,  
 I Gianizzeri , Agà , Cadi , Mufti  
 Verso el Seragio , e tuti ziga .... *Hallò*  
*Sala-mikula-ke-Al-Koranò* ;  
 Che vol dir ne l' idioma del Talmù ;  
*Palme allori a chi c' è , corna a chi fu .*

Mosso da natural curiosità ,  
 El domanda : *Gh' è qualche novità ?*  
 Ghe risponde un Iman : *No le vedè ?*  
*Le solite miserie che savè ;*  
*I à strangolà el Visir Macmu-Kepi ,*  
*E tuti fa bacan , sentiu ? senti !*  
*El Sultan ama el popolo , e però*  
*El ghe regala spesso sto gatò .*

B. -- *Nissun vorà Visir dopo Macmù ?*

T. -- *Eco là el sucessor ; vedeu colù ?*

El buta l' ochio dove i ga mostrà ,  
 E saveu mo chi el vede ? el so Bassà ,  
 Propio Kalù . Sorpreso el dise .... *Oh v' è !*  
*Xelò , o no xelo tu ? P' è lu a la fe .*  
 Kalù lo riconosce .... *Adio , bondi ,*  
*Ti è tornà , sì .... e l' anelo ? ... presto , di .*

**B. --** *Visir, ve fazzo prima un prostind .*

**K. --** *Voi saver de l' anelo .... el gastu, o no ?*

**B. --** *Eco l' anelo .... no cerchè de più,*

*Pe a mió modo, Visir, tegnile vu .*

## LA TORDINA E I TORDINOTI

**V**estio da festa, in gringola  
Sponta dal mar el zorna,  
Ragi sbrufando intorno  
Per scialo de splendor.

**Fin** quele giozze limpide  
Che la rosada sprema,  
Lu le converte in geme,  
E brila Perba e 'l fior.

**Za** la colomba rugola  
Inquieta su la gornà,  
Svola, se pente, e torna  
La prole a carezzar.

**Za** i passerotì a nuvole  
Sbrega l'aria improvvisi,  
E in bozzoli o divisi  
Va i campi a spulesar.

**Sparpagna** l'ara i vilici  
De formenton, de biava;  
Togna le strazze lava,  
Po le destende al Sol.

Chi porta giande al maschio ,  
 Chi monze vache in stala ,  
 Chi la farina zala  
 Tamisa su l' albol ;  
 Chi va a siegar el rovere ,  
 Chi buta 'l fen sul caro ,  
 Chi carga el so somaro ,  
 Chi giusta el so teler .  
 Al so bambozzo stupido  
 Menega dà la teta ;  
 Pasqua se fa la peta ,  
 Po stizza su el fogher ;  
 Vedendo l' ave a torzio  
 Che i fiori ponze e chiuchia ,  
 Spessegga la so guchia ,  
 Core Lucieta al miel ;  
 L' aseno a zampe a l'aria  
 Russa la schena in tera ,  
 Par 'che 'l dichiari guera  
 A scalzi e pugni al Ciel ;  
 Là , mentre l' oche e l' arene  
 Se sguatera in fossato ,  
 Se smozza l' onge el gato ,  
 Rosega un osso el can ;  
 Qua la galina celebra  
 El so trionfo novo ,  
 La nassita del vovo  
 Col cocodè in sopran ;

Marenda là su l' arzere  
 Pastor, piegore, agneli;  
 Pulieri, soraneli,  
 Pascola in mezo al pra;  
 Qua 'l cazzador se furega  
 Quachio tra piante e piante  
 Col so fedel Argante,  
 Co l' azzalin montà.

Ma in coa del Sol, a la lontana via;  
 Se va ingrossando un nuvoloto biso;  
 Che pien de mata invidia e d' albasia  
 Ga 'l reo pensier de spegazzarghe 'l viso:  
 E za da drio de la colina el spia  
 Se 'l pol saltarghe adosso a l' improvviso,  
 E tempestando a so dispeto un' ora,  
 Castigar le campagne che lo adora.

E infati, mentre tuto brila e splende,  
 El se converte in negra bissabova;  
 El siroco con lu za se la intende,  
 E ghe associa le nuvole che 'l trova:  
 Le prime 'l Sol ghe le sbaragia e sfende  
 Coi ragi stafilandoghe la piova,  
 Ma core un nembo, drudo de la note,  
 A taconarghe le nuvole rote.

Scampa de qua e de là canì, pastori;  
 Dòne, galine, piegore sgambeta;  
 Pianta 'l solco e la falce i segadori,  
 Uno perde 'l capelo, un la bareta;

Core soto a le piante i cazzadori ;  
 E un refolo insolente alza a la Beta  
 E cotole e camisa su la testa ...:  
 Che spettacolo ai rospi , oh Dio , la resta !

Passava quello da la marmotina ,  
 E 'l s'è avudo a segnar per maravegia .  
 La campagna diventa una pissina ,  
 Se cufa i osèi , no i bate beco o cegia ;  
 Pur tra i rami d'un olmo una Tordina ,  
 Fata da un mese mare de famegia ,  
 Stava ancora ai so fii facendo scola  
 De le teorie ch'è da saver chi svola :

Ma i so tre Tordinoti , o oseì ragazzi ,  
 Soliti andar , giusto a quel' ora , a spasso ,  
 Vedendose ficar da quei scravazzi ,  
 Zogatoli , marena , e volo e passo ,  
 Devorando le cime dei palazzi  
 El monte , el bosco , i brontola , i fa un chiasso !  
*Maledeta sta piova ( i ciga ) e chi la ...*  
 E la Tordina : *Zito là , finila .*

*Pretenderessi , stolidi ,*

*Volerghe vu insegnar*

*A chi sto mondo regola*

*Che tempo l'è da far ?*

*Se xe fenìo l'avril ,*

*I ghe xe ancora i rocoli ;*

*Pensè a scansar le insidie*

*Del vischio e del fusil .*



*Là, là ghe vol del spirito!*

*Là, ocore averlo a man!*

*Sau chi manda le nuvole?*

*Chi ve regala el gran?*

*Giove con mire provide*

*Dà la piova e 'l seren ....*

*No poderàve piover mo,*

*Farsi per vostro ben?*

*Vardè che umor! petègola,*

*Studia la to lezion ....*

*E vu, sior primogenito ....*

*Parlo con ti, frascon ....*

**Mentre la savia mare in sta maniera**

**Stava dando ai so fioi la romanzina,**

**El borin spenze el nembo in Inghiltera;**

**El scravazzo diventa piovésina,**

**El Cielo va facendo bona ciera,**

**L' arco celeste abraza la marina;**

**Sfodra i so ragi el Sol; albori, vide;**

**Monti, selve, anemali, tuto ride.**

**Ma la Tordina, che no ga in pensier**

**Che i so 'do tosi, che la so putela,**

**Col cuor d'acordo col proprio dover;**

**Coi ochi in ziro, sempre saldi in sela,**

**Scovre un oselador, che dal figher**

**Che fin' allora gh' à servio d' ombrela;**

**Muto sbrazza el fusil, e za lo monta**

**Verso quel olmo, là, dove l' è sconta :**

*Un schiopo, un schiopo! O Dio! foli, svolè ...  
 Slarghè l' ale, e la coa .... presto anca ti ...  
 Racomandève al Ciel ... là, tutt tre ...  
 Sul fenil, sul fenil, ... vè son drio mi.*

**L' oselador** à tirà el can, ma che?  
*L' azzalin no risponde che, cri-cri.  
 La piova penetrada sul fagon  
 Gh' aveva sofegà fulmine e ton.*

**Ma quando** la Tordina  
*Scrocar sente 'l fusil,  
 Ai so tre Tordinoti,  
 Che trema sul fenil:  
 Qua, qua, mozzina,  
 Qua; la dise, pissoti!  
 Slargè quel' ale ...  
 Zontè le zate ...  
 Su, quella testa! ...  
 Zo, quella coa! ...  
 Vardè là, in alto ...  
 Ste là ... cussì ...  
 E disè quello  
 Che digo mi.*

**TORDINA**

**Barba Giove** (slarghè l' ale)  
*Ste tre povere cigale  
 Scioche, mate, ma pentie,  
 Pietà implora ai vostri pie  
 Per la so temerità.*

TORDINOTI

Pietà implora ai vostri pie  
Per la so temerità .

TORDINA

*Fioca neve da quel monte ?  
Tuti tase .... ( zate zonte )  
Tuti, tase come i deve ;  
Nu mandemo fin la neve  
A fiocar de là da Stra .*

TORDINOTI

Nu mandemo fin la neve  
A fiocar de là da Stra .

TORDINA

*Fa borasca ? piove un' ora ?  
( Su quel beco ) e nu in malora  
Sti tempazzi, e chi li à fati ...  
Ma vien po 'l castigamati,  
Sponta el schiopo dal figher .*

TORDINOTI

Ma vien po 'l castigamati,  
Sponta el schiopo dal figher .

TORDINA

*Che se vu con un scravazzo  
No cambievi 'l fogo in giazzo,  
E la polvere in panada,  
Bàrba Giove, che speada  
De Tordine sul fogher ?*

**TORDINOTTI**

**Barba Giove che speada  
De Tordine sul fogher !**

**TORDINA**

*Se co nevega, o co piove ...  
( Vardè in alto ) barba Giove,  
Ne vien più de sti caprizj,  
Ah fe un viazo e tre servizj,  
E lassene fusilar .*

**TORDINOTTI**

**Ah fe un viazo e tre servizj,  
E lassene fusilar .**

**TORDINA**

*Barba Giove .... A capo, su ! ...  
Andè a marena ... e che ve senta più?*

## I DO RUSCELI

**V**erso quei tempi torbidi famosi  
Per le imprese de Thamas-Koulican,  
In Persia Pantalón dei Bisognosi,  
Onorato mercante venezian,  
Filosofo de quei proprio sugosi  
Che la natura fa co le so man,  
Disecà el so negozio, da trent' ani  
Fava vita in campagna tra vilani.  
El s'aveva comprà cento campeti,  
E un palazzin che xe una maravegia;  
El ga boaria, galine, oche, porcheti  
Col so can da pagiaro che li vegia;  
Bon pan, bon vin e tuti i comodeti  
Che ocore a far star ben una famegia,  
Senza etichete che ve seca i bisi;  
No ghe forse altrettanto ai campi Elisi.  
Lo aveva fato so mugier Pandora  
Pare de' do zemeli e d'una puta;  
Ma el di che à bisognà po che la mora,  
Pensando che Rossaura no xe brula,

Che Pantalon no ghe pol star de sora  
 Per vardarla *in utraque*, voi dir tuta;  
 La bona mare la l'ha tolta in slita  
 Per compagna de viazo a l'altra vita:

L'era donca restà coi do zemeli, .

Lelio e Florindo, che per so tormento  
 Gera mo, *circumcirca*, do storneli;  
 No miga che n' i avesse del talento,  
 Che anzi i vedeva el vovo fin su i peli,  
 Ma de' vovi un per l'altro i ghe n'ha cento;  
 E i va d'acordo in questo, che la sorte  
 Per farli grandi li aspetava in Corte.

Za i se vede la Persia in zenochion, .

E za i ga la Sultana per morosa,  
 Coghi, lachè, gianizzeri al porton,  
 E fin quatro cavaì eolor de rosa.  
 Sentindo sti stramboti Pantalon,  
 Poverazzo, la note nol riposa,  
 Che volendo i so fioi lassar felici  
 No ghe fa bon augurio sti caprici:

Lu, fin dal dì che el gera stà in meza

Zovene de negozio in Rugagiufa  
 Titoli, onori, sfarzo, autorità,  
 El li credeva, che sòl mi, una trufa;  
 E po el meteva la felicità  
 Ne la moderazion, che la barufa  
 Previen, che la rason deve far spesso  
 Con qualche vizio che ghe insidia el sesso:

*Oh, el dise un dl, Lelio vien qua, Florindo  
 Vien qua anca ti, ste atenti tuti do .  
 Mi, foi, come vedè, vado morindo,  
 Mel dise quel che go, quel che no go ;  
 Poderia comandarve, ma prescindo  
 Da la mia autorità, perchè za so  
 Che co 'l pare xe vechio, i fioli pensa  
 Che l'abia fato un per de ziri in sensa .*

*Donca andè pur, ve benediga el Cielo ;  
 Ma prima che partì, ve vòì contar  
 Una fiaba, che par fata a penelo  
 Per chi sta ben e no ghe vol mo star ;  
 Me l' à dita mio pare Stefanelo,  
 Che no gera un capon, Stèla a scoltar,  
 E se no avè per logica una piavola  
 Sgarugievene el senso. Eco la favola:*

- „ Una volta da le vissere  
 D' una florida colina  
 Xe sta visto, là a la China,  
 Do rusceli scaturir.
- „ L' onda pura i sgorga unanimi  
 Per un facile declivio ,  
 Ma ghe mostra presto un bivio  
 Destin vario da seguir.
- „ Prai , vignete, boschi ombriferi  
 Un li chiama a fecondar ,  
 L' altro al Ciel per tubi idraulici  
 Geme limpide a vibrar .

- „ Un dei do rusceli in gringola  
 • Sdegnà in bota i fiori e l'erbe,  
 Vol portar l'acque superbe  
 Ver la Regia 'de Pechin.
- „ L'altro invece, nato d'indole  
 Più modesta e più tranquila,  
 Score lento per la vila,  
 D'ogni campo fa un zardin.
- „ Qua 'l ristora verze e brocoli,  
 Là el va i bisi a rinfrescar,  
 Qua 'l conforta peri e persegghi,  
 Là el fa i sparesi spontar.
- „ Va Lucieta sul so margine  
 Fiori a scieglierse la festa,  
 La se i punta su la testa  
 Consultando quel crestal;
- „ Là gh'è adosso col so credito  
 Momoleto dal bel naso,  
 La ghe paga el pro co un baso,  
 Lu ghe dona el capital;
- „ Fa quel dopio verde pascolo  
 Manzi e piegore ingrassar,  
 De qua Biasio sona el pifaro,  
 Senti Pasqua là a cantar.
- „ Su le rive amene e fertili  
 De quel placido ruscelo  
 Fa i paesani el ghiringhèlo,  
 Va le femene a filò.



- „ Tosi e tose qua se biscola ,  
 De là i zoga a Maria-orba ,  
 Quel se sconde in l'una corba ,  
 St' altro trota , e tunfe zo .
- „ Per quel chiaro umor diafano  
 Che fa i cogoli brilar ,  
 Luzzi e trute sguinza e bagola ,  
 Va le anguile a serpegiar .
- „ Xe alfin tanti i benefizi  
 Che fa ai campi quel 'bel rio ,  
 Che i paesani el crede un Dio ,  
 E i lo adora in zenochion .
- „ Che se mai gh'è chi l'intorbia ,  
 Chi stornar ghe vol el corso ,  
 Gh'è chi 'l fa balar da orso  
 Soto ai colpi d'un baston .
- „ Cussì 'l resto d'aque limpide  
 Che in tributo el porta al mar ,  
 Dolci ancora come el zucchero  
 Va i sturioni a consolar .
- „ Ma tornemo a so fradelo ,  
 A quel mato de Ruscelo ,  
 Che la boria crede gloria ,  
 Che se imagina a Pechin  
 De cambiarse l'acqua in vin .
- „ No l' à apena la colina  
 Quel mozzina abandonà ,  
 L' è stà apena ne la vale ,

95

Che a le spalle gh'è saltà,  
Ortolani, zardinieri,  
Coghi, sguateri e stafieri,  
E periti e parassiti,  
Tuto el treno numeroso  
Del superbo, del fastoso  
Mandarin Kekakalà.

La probosside voi dir  
El Visir de so Maestà.  
I ghe incalza adosso l'onda,  
I ghe cambia leto e sponda,  
I lo sera soto tera,  
I ghe fa zirar le grote  
Dove el di dorme la note;  
È per gatoli e calete  
Fate a bissa strete strete;  
I lo torna a cazzar su,  
Ma ruscelo no l'è più.

„ L'è là statua in porcelana,  
Qua a man dreta l'è un putin  
Che ne l'ato de far nana.  
Lassa andar el so pissin;

„ L'è un Confuzio in barba d'oro  
Che fa inchini e riverenze,  
E da questo e da quel foro  
Shrufa liquide sentenze:

„ L'è 'l gran Lama che co un scovolo  
Sguazza i preti del Thibè:

- L'è un stafier co la so cogoma;  
 Che ve spande adosso el tè;  
 „ Là a man zanca l'è un soldà  
 Col so schiopo ben cargà,  
 Che za tira el bagagiol,  
 E schizzeta Lùna e Sol;  
 „ L'è un Santon che versa lagreme  
 Per eccesso de dolor  
 Sul destin dei galantomèni,  
 Sul sepolcro de l'onor:  
 „ L'è un monarca che scialaqua  
 Sparpagnando *gratis* l'aqua;  
 L'è una dama che recama  
 A perlete, a l'arabesca  
 Pont' in aria d'aqua fresca.  
 „ Fato piova cristalina,  
 Larga conca alabastrina.  
 Lo raccoglie in un bersò;  
 E 'l Visir dal bel veder  
 Conta i zoghi per piaser.  
*Belo ('l dise) ... e un trenta dò!*  
 „ St'onor donca no xe raro!  
 Ma pur deve quel Ruscelo  
 Fin sto belo, pagar caro!  
 La gran vasca dove el casca  
 Soto el peto ga un buseto  
 Co la storta, che lo porta  
 Zorno e note in t'una bote,

Che lo svoda da la spina  
 Su la scafa de cusina .  
 Cussì dopo d'esser stà  
 A vangae desbatizà ,  
 Dopo aver ben recità  
 Da gran Lama , da soldà ,  
 Da damina , da putin ,  
 E da zane e buratin ,  
 Strupio , storto , snombolà  
 Cossa s'alo guadagnà ?  
 D'esser beco e bastonà !  
 De lavar fin che ghe n'è  
 Piatì e squele , e po el *Privè*  
 Del Visir Kekakalà . "

De sta fiaba che termina cussì ,  
 Florindo la moral l'ha sgarugià ;  
 Tranquilo in vila l'à finì i so dì ;  
 Ma Lelio più bizaro , o più ostinà ;  
 Xe andà a brilar in corte del Sofi ;  
 E l'è stà per equivoco impalà .  
 Mi digo ch'el destin dei do Zemeli  
 Se l'è intesa con quello dei Rusceli .

## M E N G O N

**C**uorì stuchj d' insidie e tradimenti,  
Calunie in bocassin da pute oneste,  
Astréa col gua che ghe dà 'l filo ai denti,  
Castità in conferenza co la peste,  
Logicidj perpetui, odj, lamenti,  
Guera, fame, poeti, e noja; queste  
In sta vale de pianto, e chi nol sa?  
Xe le delizie de la società.

**Ma** mi da qualche tempo ò scomenzà  
A viver tra le bestie, e ghe la cato;  
Fazzo conversazion col papagà,  
Filosofo col can, zogo col gato,  
E se quel che 'l lion m' à lassà là,  
Vien el lovo a magnarmelo sul piato,  
Monzo la vaca, e vivo graziadio;  
S' el beco me vol mal, l'aseno è mio.

**So** che le bestie ( no me tiro in drio )  
No xe gnanca ele tute de un umor,  
Ma contro vinti da butar in rio,  
Ghe ne conosso cento de bon cuor.

Anca tra i bruti dà su qualche fio ...  
 Gh'è 'l so ladro, el birbon; ma mi, in onor,  
 Furbo per furbo, no ghe penso su;  
 Togo la volpe, e lasso l'omo a vu.

Cussì credo faria, s'el vive più,  
 Anca Mengon paesan a la Tisana:  
 Vechio col cuor ben tapà de la virtù,  
 Come un monton de Scutari de lana.  
 Per ascoltarlo e consegnar con lu  
 Vedè in moto 'l Friul, la Trevisana;  
 Ogni so deto par una sentenza,  
 E l'esempio ghe serve d'eloquenza.

La so solita camera d'udienza  
 Xe là in fondo al cortil soto 'l tezon;  
 Quaranta fioi co la so discendenza  
 Ogni matina, senza confusion,  
 Se ghe afòla d'intorno; con pazienza  
 Lu ghe tamisa i torti e le rasen,  
 Ascolta i dispareri e li compone.  
 Nè mente in fazza soa gnanca le done.

Vardèlo là! No parlo Simeone  
 Pusà sul so baston de cereser?  
 Che bei cavei! che barba! che cegione!  
 La polvere nevosa de zener  
 Gh'à fiocà su. E quel oson che impone!  
 Quela fisionomia! No xe un piaser  
 Veder, sentirlo de cent'ani e un  
 Parlar quatr'ore e no secar nissun?

Gero là mi co è vegnù da Belun  
 Per squadrarlo l' abate Baracò;  
 Quel che i Savj à mandà de l' olant' urt  
 A Padoa per drezzar i corni al Bo.  
 Se avanza gravemente l' *Ego sum*,  
 El bozzolo se strenze in forma d' *O*;  
 Duro el pedante, e dreto come un *I*,  
 Tosse, e dise a Mengon proprio cussi:

*Nonno, vorrei saper ( no, mon ami,  
 Sans façon, sans façon ) chi fu il maestro,  
 Onde imberbe apprendesti l' abbicci?  
 Chi primo di Sofia t' ispirò l' estro?  
 La tua ragione rustica vagl',  
 Balbetò a lungo, o fosti ab ovo destro  
 Ne l' intellettual scuola onorata  
 Onde il Socrate sei della brigata?*

*A reficiarti l' anima assetata*

*E' qui Minerva a poppe gonfie accorsa?  
 O la terra; da Saggi un dì abitata,  
 Hai quinci e quindi ecclissando scorsa?  
 Ch' io so che mesci epicurèa derrata  
 All' acre di Zenon che i sensi immorsa;  
 E stendi pitagorica vernice  
 Sul To-Kalon che dal ciel Plato elice:*

*Ma, gnaffè! c'è di più. La fama dice  
 Cose di te che a stento creder posso;  
 Tu non brami che ciò che bramar lice;  
 Altrui cedi la polpa, e rodi l' osso.*

*Sei benefico, povero e felice ;  
 Or com' è ciò ? Sì bujo paradosso  
 Di tenebror l' entellechia mi cinge,  
 Sciommi l' enigma or tu, Nestorea sfinge :*

*-- Fu parole in carrozza su le cinge,  
 Mi strupie, senza scarpe, in nuda pele ;  
 Quel che me strenze mi, vu mo vel stringe,  
 Vu Febo al Sol, astri disè a le stele ;  
 Mi piove, e vu : Giove dall' alto minge .  
 Ve recordeu la tore de Babele ?  
 Ghe responde Mengon , Monsieur l' Abbé,  
 Se v' abia inteso, o nò, lo sentirè .*

*De le dotrine che me celebrè,  
 De sti protti d' aerea architettura  
 So apena i nomi, o poco più a la fe ;  
 So ch' el sistema, el sogno e l' impostura,  
 Pol calar stola insieme tuti tre,  
 Mi n' ò studià ch' el cuor e la natura :  
 M' à insegnà quello la filosofia,  
 E questa m' à imprestà la libreria ;  
 Mi ò scomenzà putèlo in compagnia  
 De l' alba a contemplar le stele e 'l Cielo ;  
 Po da la colombera a la boaria  
 Tra le piegore, l' oche e l' asenelo  
 O' fato fursi più de vussioria ;  
 A poco a poco m' ò copià el modelo  
 De le prime virtù, de la moral  
 Che in boca dei pedanti ha perso el sal,*



**E per esempio: el colombo leal**

*M' à dito: sii fedel a tò mugier.*

*M' ocoreva sunarme un capital?*

*M' à insegnà la formiga el so mestier.*

*L' agneleto, incapace de far mal,*

*M' à la conscienza trasformà in dover;*

*M' à dà l'esempio el manzo de costanza.*

*E Melampo e Fasan de vigilanza.*

**E se no avesse amor ( che me ne avanza )**

*Qua per sti fioi che me tien neto el forno,*

*Me n' avaria l'esempio dà abastanza*

*La chioca e i pulesini che go intorno.*

*Cussi senza xirar Italia e Franza*

*Da le bestie, Bonsior, o note o zorno,*

*M' ò becà una lezion, sia senza ofesa*

*De Socrate, o dei Padri de la Chiesa.*

**Possio? fazzo del ben, ma de la spesa**

*Paga el pro la conscienza in tanto gusto;*

*Co l' amor proprio se l' à sempre intesa*

*La carità d'un cuor tenero e giusto.*

*I desiderj po? fata la resa*

*Dei conti a la rason, spegazzo e giusto.*

*Cussi in pien me la passo. Ma felice ...*

*L' aveu mai vista l' araba fenice?*

# INDICE

<i>La Verità e la Favola</i> . . . . .	pag. 9
<i>L'Ava che beca</i> . . . . .	12
<i>El Cingano</i> . . . . .	14
<i>I do Lioni</i> . . . . .	18
<i>L'Ava e 'l Pavegio</i> . . . . .	21
<i>Kakalor e Kinkà</i> . . . . .	23
<i>El Lion e 'l Mossato</i> . . . . .	25
<i>La Fenice</i> . . . . .	28
<i>El Re de Cope</i> . . . . .	33
<i>I Casteli in Aria</i> . . . . .	38
<i>El Mulo in gloria</i> . . . . .	40
<i>Barba Simon e la Morte</i> . . . . .	43
<i>El Sol e i do Papà</i> . . . . .	47
<i>Tognoto e la Morte</i> . . . . .	53
<i>El Putelo e la Luna</i> . . . . .	55
<i>El Paralitico e l'Orbo</i> . . . . .	58
<i>El Grilo e la Farfala</i> . . . . .	63
<i>El Progeto e l'Aseno</i> . . . . .	66
<i>El Lovo e la Cicogna</i> . . . . .	69
<i>La Lezion</i> . . . . .	70
<i>El Visir e l'Anelo</i> . . . . .	76
<i>La Tordina e i Tordinoti</i> . . . . .	80
<i>I do Rusceli</i> . . . . .	88
<i>Mengon</i> . . . . .	96









